

2 Samwel

Devid wuku bade elkv ni Sol

¹ Eji Sol ma kpo, Devid kehng ehta bi á song nok ga anebe Amalek, á kange nfung ebal go Jiklag.

² Go nfung era, á nyehne nne ma lohng go ellong nsoja nyi Sol ba, no nsol ebjing me-e yare, a ebtoho go esi. Eji á ba goji Devid á gbo noongo go ndi ka Devid ekpunu.

³ Devid kehm-e bahbe re, <<Á lohng gan?>> Á kehm faange re, <<Me m be lohng go ellong nsoja nyio nyi anebe Isreel.>>

⁴ Devid kehm-e bahbe re, <<Jenji ma lim? Tong-m>> Á kehm faange re, <<Ane ebbe go ehta, gbalee bobwul bo. Fvfo Sol a Jonatan mmon ewe bobkpo.>>

⁵ Owo Devid kehm tongo njangkun nyi ko etib ba tong-e re, <<A limi renan kehm kahne re Sol a Jonatan mmon ewe bobkpo?

⁶ Njangkun nyio kehm bungu re, <<M ba sebe kahn re n li go ewong ji Gilboa, fvfo n nyehne Sol o, ma gbo yakke go ege elkong, nga amvtv ehta a abaf'fingi ba jo kam-e, me-e kabbe.

⁷ Eji á keebe no nyehn-m, á kehm-m lungu, n kehm faange re, <Nyehn me ga!>

⁸ Á kehm-m bahbe re, wo nne awoo? N kehm faange re, <<Me nne Amalek wo.>>

⁹ Owo á kehm-m tongo re, <<Yiimi a kohl-m wo wul-m, n li go emel elkv, wo ga, me n kpeka li go elkpin.>

¹⁰ Ano wo n yiimi kohl-e, fere wul-e, tibre n k'kahn re eji bo me-e yehke alok, á nehm kpe kpin. Fvfo n rodo ekpasi etul ji konng-e go esi a ebil ngbakebil nyi woom-e ekv ebo, nya nya m ma ko re me m ba ka nsoo ewame.

¹¹ Owo Devid a ane ebe kpee ba li a ne, kehm jabbe abomo ebo, tohng yare.

¹² Bo ji ndon ndon jo ling, fere bade njal tete elgung ba, tib esi Sol a Jonatan mmon ewe, tob jolo ka nsoja Jehova a anebe Isreel kpee, tibre bob wul bo go ekahngkahng.

¹³ Devid kehm tongo njangkun nyi ko etib ba a bi re, <<Gan wo a lohng no? Á kehm faange re, <<Me mmona nne ajahmjahm wo, nnea Amalek.

¹⁴ Devid kehm bahbe re, <<N'nan ki-a mennge re wo rod ebo eba wul nne no Jehova kak-e akehng go esi?>>

¹⁵ Owo Devid kehm lungu nne awohng ewe fere tong-e re, <<Song wul-e, á soro song wul-e.

¹⁶ Devid tongo nnenlum noo re, <<Alung ema kuumu wofono antahng ega esi. Nnyo ema ebfvrvv bade a na, eji a bungu re, <Me n wul nne no Jehova kak-e akehng go esi.> >>

Devid lingi Sol a Jonatan

¹⁷ Devid kehm yimi ese eling jia kak Sol a Jonatan mmon ewe,

¹⁸ á ka ejehke re, bo tib anebe Juda eling ese jia, bo nyono kak nwer nyi Jasar

Devid yiimi Ese

¹⁹ Eyee Isreel, egburu nne ano ewahne bo me-e wul go ewong! Eyee nyehn ana egburu nne ma gbo kpo!

²⁰ Kana tooro go Gati, kana tiingi go afaka abang nya Askelon, eji abon ba nkal ba anebe Filista l'k'jo geere, eji abon ba nkal ba ane ba kil jo yehke nrur l'k'bel eyebatahng.

²¹ Wahn awong nya Gilboa, nong ebohng afi elahb k'kpe na ka-n, nong akpak kpak elahb k'kpe na wohngo egahna edi egbe, nya kpo lak nkohl nyi ajom alimi. Tib o wo, bo daange ekum bi etahntahn nne, ekum bi Sol, akehng bo joom kpe taame.

²² Elban ni Jonatan feerem njahm, ekahngkahng bi Sol feerem abo abo, go alung nne no á wulu no, fvfo go ngubjing nyi etahntahn nne.

²³ Sol a Jonatan, go ebo elkpín, bo jolo akorokoro fere jol yebe yebe, jol go ebo elkv bo yabem. Bo jo ware sehngé akpi, bo jo tahne sehngé agabe.

²⁴ Abon ba nkal ba Isreel, lingen Sol, ye ji bob-n abomo nya kp'bili, ye ji liib-n akpawobo nya bo kanna agul tohko.

²⁵ Eyee, atahntahn ane ebgbo go ebta, Jonatan bo me-e wul tub egahna awong.

²⁶ Kp-m maange ka-a Jonatan mmonannee, a jo kor-m sehng, elgoro ni a bele aname jolo nkpokosi sehng, jol sahb kp'kpo esi sehngé ni anebkal.

²⁷ Eyee, nyehn ana atahntahn ane ma gbo kpo, nsol ebta ebtan.

Devid bo me-e kak akehng esi re á jol ntul ka Juda

¹ Eji ma kang, Devid kehm bahbe Jehova re, <<M bahke ma tahm song lene go ejahbe Juda ajahnga?>> Jehova re, <<Song me,>> Devid kehm bahbe re, edi ajii? Jehova re, <<Go Hebron.>>

² Owo Devid kehm tahme a akal ebe abal. Bo jo lungu bo re, Ahinoam ji lohng go Jejireel abola Abigail, ye ji jolo nkalebun no Nabal ji Kamel.

³ Devid fvfo tob tahme a aneblum ba jolo a ne, no nne tahme a nnaahb enye, bo song lene go abon ajahbe jolo sennge Hebron kak.

⁴ Owo aneblum Juda kehm bake go Hebron, ona wo bo wohngo Devid akehng go esi fere bob-e etul ka et'tohngo ji Juda.

Owo bo tongo Devid re aneblum ba lohng go Jabesi Giled ba ma kpa Sol kak,

⁵ á tumu abatiingetib tv bo fere tong bo re, "Jehova fuulen eji m ma tib Sol ji jolo ntubesi ewahne nnoobo eljini, go elkake ni m me-e kpa kak.

⁶ Nong Jehova tiben nnoobo eljini a ekakesehk, me fvfo, m bahke tob tiben ndon ny'nehm tib eji m ma lim jia.

⁷ Anv, belen atahne, wahn bel esahb, tib Sol ji jolo ntubesi ewahne ebkpo, anebe Juda ma-m bob etul re me n jol ntula bo.

Ebta kehm gboko go etahk ji Devid a etahk ji Sol

⁸ Go ngare nyio, Abner mmon no Ner, ye ji jolo ntubesi abanoko ebta no Sol rodo Isiboseti mmon no Sol, ko-e tahm a ne go Mahanam.

⁹ Á song bob-e etul, á jol ntul no Giled, Asuri a Jejireel, fvfo tob jolo ka Efriim, a anebe Isreel kpee.

¹⁰ Isiboseti mmon no Sol kange nnya atahl abal eji á jolo ntul no Isreel, á fili ejahbe go nnya ebal. Et'tohngo ji Juda tiki sa woomo Devid go elwo.

¹¹ Ngare nyi Devid jolo ntul go Hebron ka Juda, á fili edi nnya esehma, kunu nnyahng erakera.

¹² Abner mmona Ner, mehle go Mahanam a nsoja nyi Isiboseti ji mmona Sol, fere tahm go Gibion.

¹³ Joab ji mmona Jeruya a nsoja nyi Devid lohngo song kpiri bo go etolahb ji Gibion. Ellong anehng ji, ejang etolahb jehko, ellong nehko ji ejang jehka.

¹⁴ Owo Abner kehm tongo Joab re, <<Nong ajangkun lohng yiimi nok abo abo egahre esamahr.>>

Joab re, <<Ebnob nong bo lim ano!>>

¹⁵ Owo bo kehm mehle yiimi, bo fange bo yehke, ewubu aneblum abal ba jolo ka Benjamin, a Isiboseti ji mmona Sol, eji Devid jolo ewubu ane abal.

¹⁶ No nne tub ntem ejahm go esi, fere jahm-e ekere go ngbaange bo gbo ndi ane abal abal kpo. Tib ano edi jio ji Gibion bo jo lungu re, <<Emang ji akahngkahng.>>

¹⁷ Ebta fubu efung bio area, Abner a nsoja nyi Isreel, nsoja nyi Devid g'ga bo.

¹⁸ Abon ara ba nlum ba Jeruya jolo o: Joab, Abisayi, a Asahel. Asahel jo sahb b'be ana mbul emahng.

¹⁹ Á jo kame Abner, jol á joom gbake je eboblum afi ebobkal, eji á jo kam-e.

²⁰ Abner kehm keebe njahm kehm bahbe re, <<Asahel, wo woa?>> Á faange re <<Ee, me wo.>>

²¹ Abner kehm-e tongo re, <<Kpur ejang eboblum, afii ejang ebobkal, yehke njangkun anyehng wo taar-e nsol ebta enye. Wo Asahel we-e tikem rahke elkame.

²² Abner kehm kpe rehke Asahel re, <<Rahke, ka-ma kpe kam, jenji wahnge m bahk-a wulu? n l'wul-a, m bahke kpe jo sahb seenge esamahr bi Joab mmonanne renan?>>

²³ Wo Asahel we-e tikem rahke elkame, owo Abner kehm jahme Asahel elkong ene go ala bohngo go njahm. Á soro gbo ndi kpo elahbe. Nne awohng awohng no jo sehng jo ba sa yiimi edi jio ji Asahel gbo no kpo.

²⁴ Wo Joab abola Abisayi jo kame Abner, eji njul ma ji egbiri, bo ba rehng go ewong ji Ama, kohlo Gia mbang mbang nyi edi erikendi ji li wum.

²⁵ Owo ane ba et'tohngo ji Benjamin kehm kono yiimi njahm nyi Abner, bo ba fadde elbo jol ellong anehng, song sehke ata go ero ewong.

²⁶ Abner kehm rabe lung Joab tong-e re, abohng nyaa ga ekahngkahng bahke sake ano anoa? a nehme kahn re bahke song kohlo go elmaanga? Bahke kange renan a kehm tongo ane eba re bo rahke elkame Isreel ane ebo?

²⁷ Joab kehm faange re, <<Etingitingi, ana Es-owo li go elkpin, a kala bung ana, ane baa jol soro asi jo kam bo, tete efungfu se.>>

²⁸ Owo Joab kehm woro ntang, nsoja ebo kpee

kehm rahke, bo joom kpe kam anebe Isreel, jol bo joom kpe nok.

²⁹ Atv mao kpee Abner a nsoja enye, jene sehng go edamme ji Araba. Bo siiri aya Judan soro asi tete efungfu se, bo ba rehng Mahanayim.

³⁰ Owo Joab rahke elkame Abner, bo nsoja kpee fere song kono edi ajehng. A l'yehke Asahel bum nkpe, elku ane ani ba Devid, bo kpeem nyehn bo.

³¹ Wo ane ba Devid wulu, ane atahlku atahlara ba et'tohngo ji Benjamin bo ji jolo nsoja nyehko nyi jolo a Abner.

³² Bo rodo ekv ji Asahel song kpa kak elahm bi nde go Betlehem. Owo Joab a ane ebe, bo jene atv atv kpee tete song rehng Hebron eji efungfu ma se.

3

¹ Ebta bi jolo nlaaga nyi Sol a nyi Devid kange gbalee. Etahk ji Devid jo gbale na jo tahne asongo asongo, wo ga nlaaga nyi Sol jo kooko na asongo asongo.

² Akal ba Devid jele abon ba nlum go Hebron ka Devid. Ngbokambang bo jo lung-e re Amnon, nnyehn bo jo lung-e re Ahinoam nnea Jējireel.

³ Etoono bo jo lung-e re Kileab, nnyehn bo jo lung-e Abigail nkalebun Nabal nnea Kamel. Etoono ane ara Absalom, nnyehn bo jo lung-e re Maaka mmon no nkal no Talmayi ntul no Gesur;

⁴ etoono abon ani, Adonija, nnyehn bo jo lung-e re Hagiti. Etoono abon alon, bo jo lung-e re Sefatiya, nnyehn bo jo lung-e re Abital.

⁵ Etoono abon arakera bo jo lung-e re Itiream mmon no Egla nkala Devid. Baa bo jele bo ka Devid go Hebron.

Abner lohngo nsoja Sol feere goji Devid

⁶ Go ngare nyi ebta jolo ane ba etahk Sol, a ane ba etahk ji Devid, Abner bele atahne, yiimi go ekakesehk, ege a nji, go etahk ji Sol.

⁷ Sol t'tohko bel nne elkoro no bo jo lung-e re Rijipa ji mmon no nkal no Ayiya. Fvfo efung abehng Isiboseti kehm tongo Abner re, <<Jenji wahnge a kp'noongo a nne elkora nsoo?>>

⁸ Abner atahng rak-e sehng tib ejum ji Isiboseti bungu no. Owo á kehm faange re, <<Me mbv nyia, nyi kpi eltum ka-n wahn anebe Judaa? Lela, me n rede elname nlaaga nyi Sol nso, ka nnahb enye a ate ebe. Wa-a n yakem ka Devid. Jol tvtv o, a maam lake nfem bada nnenkal noa.

⁹ Nong Esowo lam me Abner, sahb b'bib aname, n l'fere kane ellimi ka Devid ji Jehova nyame no tong-e ko nwongo,

¹⁰ fvfo fere feere etul bi nlaaga nyi Sol song nyange eti etul ji Devid ka anebe Isreel a Juda bomo go Dan song rehng go Beeseba.

¹¹ Isiboseti kpeem sahb bung ellum anehng anehng tob Abner, tib á jo fahl-e fahl.

¹² Owo Abner kehm tumu atiatingetib tv Devid ege enyo, re bo song tong-e re, <<Nne awoo li nfona ndi, ko nwongo aname, m bahk-a kake ebo ko anebe Isreel kpee ba ka-a.>>

¹³ Devid re, <<Ebnob sehng, m bahke koko nwongo a na. Wo n kp'sebe ejum ajehng go ega.

Ka ba egame elbohngo, tohko jol re a koo Mikal mmona Sol ba a ne, a l'ba re wo ba nyehn-m.>>

¹⁴ Owo Devid kehm tumu attingetib tv Isiboseti mmon no Sol, bahb-e re, <<Ka-m Mikal nkal ewame, ye ji n koo adokodoko anebe Filista atahl alon ka elaame ko-e go elbal.>>

¹⁵ Owo Isiboseti kehm kake elkahn re, bo yehke etahk nlum we Patial mmon no Laisi.

¹⁶ Wo nlum we Patial t'tahm jo toon-e jo ling mbang mbang toono go njahm asongo go nfam nyi Bahurim. Owo Abner kehm-e tongo re, <<Feere song kehng, á kehm feere!.>>

¹⁷ Abner kehm kpiri anebkul Isreel bung re, <<Ebkang ji m jo toobo re wahn bob Devid etul á jol ntul ewahne.

¹⁸ Anv, limen ano. Tibre Jehova nyame tong Devid re, <Goji Devid nlokeltum ewame wo m bahke tahre anebe Isreel ane ebame yehke go abo nya anebe Filista a abo nya anebekv ebo kpee.>>

¹⁹ Abner fvfo bungu a et'tohngo ji Benjamin antahng. Owo á kehm tahme go Hebron re á song tong Devid ejum ajehng ajehng ji anebe Isreel a et'tohngo ji Benjamin kpee kp'sebe re bo lim.

²⁰ Eji Abner ji bele ane eltahl ba jo toon-e ba goji Devid go Hebron, Devid limi elkak ka-e a ane ebe.

²¹ Owo Abner kehm tongo Devid re, <<Nong me n tahm anv tvtv song lung anebe Isreel kpee kono edi ajehng ka nsoo ntul ewame, eji bo l'ko nwongo a na, eji wo l'fili bo kpee ana eltim yeb-a no.>> Owo Devid kehm tongo Abner re á song kehng. Á kehm tahme kehng go eyebatahng.>>

Joab wulu Abner

²² Ana aneblum ba li a Devid a Joab kp'na kehng e enok bi bo je no fere da nsol gbalee ba a nya. Fvfo Abner kpeem jol a Devid go Hebron, tibre Devid me-e tum re á song, yeb feere fi go elkoono.

²³ Eji Joab a nsoja kpee nyi jolo a ne ma kehng e, bo tongo Joab re Abner mmon no Ner ebba goji ntul, fvfo ntul me-e tong re á song, fvfo yeb feere fi go elkoono.

²⁴ Owo Joab kehm jeke goji ntul fere bung re, <<Jenji á ma lim? Nyehno, Abner ebba go ega. Jenji wahng e a me-e yake á ma tahm? Anv á fi!

²⁵ A kp'kahne Abner mmon no Ner, á ba re á ba nehm-a fere nyehn ana a kp'jene, fvfo seb ejum ajehng ajehng kahn ana a kp'limi.>>

²⁶ Joab kehm tahme Devid sa song tum atiiingi etib tv Abner, bo song ko-e go edi elbing alahb akuuru ni Sira feere a ne. Wo Devid kahnem ejumjum.

²⁷ Eji Abner ma feere ba Hebron, Joab ko-e tahm a ne go monkpohko, atahng ekp'kpa, are á yake bung a ne mbehr mbehr. Ona wo á bongo alung ma Asahel mmonannyehn, ye ji Joab wul-e no.

²⁸ Ngare ntiil eji Devid ma wuk bade ejum jia, á bungu re, me a anebe etul ebame, e nehme kahn ejumjum go esamahr Jehova bade alung ma Abner mmon no Ner.

²⁹ Nong alung eme gbo kuumu esi ji Joab a ebangenahb eje kpee. Nong ebangenahb ji Joab k'tiki jol k'bel nne no kpi, esabsab elok, afii abili, afii jo jen go ehti, afii no gbo yel ekahngkahng,

afi no li elehng nsol alehke.

³⁰ Joab a Abisayi wulu Abner, tibre ye wo wulu Asahel mmonannyehn bo, go ebta bi jolo go Gibeon.

³¹ Owo Devid kehm tong Joab a ane kpee ba jolo a ne re, <<Yaren abomo enyahne, wahn fere kak agbajake nsol, wahn jo jen go eling go esamahr ekv ji Abner,>> yefono ntula Devid jo jene ano toono ngubjing nyi Abner.

³² Bo kpa Abner kak o Hebron, ntula Devid lingi wahre wahre go elahm bi Abner. Ane kpee ba Devid tob lingi ano.

³³ Ntul yimi ese eling bia ka Abner. "Anv, Abner kpo ana ebi nnea?

³⁴ Bo wa-a gbam abo, bo wa-a kakem afarebok go akpade. A gbo ana nne no gbo yel abo ebi nne." Fvfo ane kpee kehm-e kpe ling budu.

³⁵ Owo bo ane kpee kehm bake ba gboongo Devid re, a li nsol eji njul kpeka li, wo Devid ko nwongo bung re, "Nong Esowo bib aname sahb s'sab n l'fere wuungu ebgbu afi ejum alehke ajehng ajehng tete njul ji egbiri!

³⁶ Ane kpee k'kahn fvfo k'kor bo, etingitingi ejum ajehng ji ntul limi no k'kor bo.

³⁷ Go efung bio wo ane kpee ba jolo o, a anebe Isreel kpee kahne re ebo bi ntul woomem go ewul bi Abner mmon no Ner.

³⁸ Owo ntul kehm tongo ane ebe re, <<N' nehme liingi re ntubesi a nsoja, a egburu nne ebgbu lela a Isreela?

³⁹ Wo lela jolo jolo kan re bo ma-m bob etul, eko ma-m tan, wo abon baa ba Jeruya bo kp'tahne sehng ka-m. Nong Jehova bongo nlimi eb'bi jang

jang ana á limi no!>>

4

Ewul bi Isiboseti

¹ Eji Isiboseti mmon no Sol wuku re Abner ebkpo go Hebron, eko tan-e tan, fvfo anebe Isreel kpee, edi j'joobo bo.

² Jolo ano re mmon no Sol bele aneblum abal, bo ji jolo atubesi ellong ane jo kpu nsol ane, noko bo jo lung-e re Baana, noko Rekab, bo jolo abon ba Rimon nnea Beeroti ji lohng go et'tohngo ji Benjamin, Beeroti, bo kpo ko edi jia re li ka Benjamin.

³ tibre anebe Beeroti be tahm go Gitayim song jol o ana ajahmjahm tete rehng lela.

⁴ Jonatan mmona Sol bele mmon no nlum no bo jo lung-e re Mefiboseti. Á jolo nnya elon eji etib ba no bada elkv ni Sol abola Jonatan, bi lohngo go Jeyireel. Nne no jo renng-e kehm-e rodo jo be a ne. Eji á jo foomo, á foor-e gbo, akpade abal abal lohng, a kpeem ma jo jen.

⁵ Rekab a Baana abon ba Rimon nnea Beeroti kehm lohngo asongo go etahk ji Isiboseti, bo rehng o ngare efin, ngare nyio Isiboseti jo re ekv.

⁶ Bo yele eksp'kpa, are bo fi song ko (aweat) bo kehm-e jahme go ala. Owo Rekab a Baana mmonannyehn kehm weele be.

⁷ Bo yele go eksp'kpa ngare nyi á noongo go edilnong, ege eksp'kpa elkang. Eji bo jahm-e no wul, bo kim-e esi, rod tahm a ji. Bo jene atv atv mao kpee mbang mbang nyi edamme ji Araba.

⁸ Bo ko esi ji Isiboseti ba ka Devid go Hebron kehm tongo ntul re, "Nyehn esi ji Isiboseti mmon no Sol, ji nnekv ewa, ye ji jo gaare re a wul-a. Lela Jehova ebbongo Sol a ane ebe ka-a nsoo ntul ewame.

⁹ Devid kehm faange Rekab a Baana mmonan-nyehn, abon ba Rimon nnea Beeroti re, "Ana Jehova li elkpín, ye ji ma-m yehke go ntong anyehng anyehng,

¹⁰ eji nne ba tong-m re Sol ebkpo, tir re, á ko nnoobo etib ba a bi, n bob-e wul go Jiklag. Ano wo jolo eltuuru ni n ka-e no ege etib!

¹¹ Bahke jolo renan, eji abi ane ma song wul nnea mbol mbol ege etahk, fvfo ege edilnong, anv nehm fuumu re me n bahb alung eme egahne abo fere yehken go njina?

¹² Owo Devid kehm kake ane ebe eko, bo wul bo. Bo kiimi bo akpade a abo, fere rod agubjing ebo song tohko go nkpe eto. Wo bo rodo esi ji Isiboseti song kpa kak go elahm Abner go Hebron.

5

Devid jolo ntul ka Isreel

¹ At'tohngo kpee nya Isreel ba goji Devid go Hebron ba bung re, "Nyehn wahr ga, wahr ane eba ba."

² Go njahm, eji Sol jolo ntul ewahre, wo wo jolo nne no jo jen a anebe Isreel go nsoja, ko bo je ebta fere feere a bo. Jehova tong-a re, wo wo bahke jo baabe anebe Isreel ebame, wo bahke jolo nf'fili a bo.

³ Eji anebkul Isreel kpee ma ba goji ntula Devid go Hebron, ntula Devid kehm koko nwongo a bo go Hebron go Esamahr bi Jehova, bo wohngo Devid akehng bob-e etul, á jol ka Isreel.

⁴ Devid jolo eltahl a nnya ewubu eji bo bob-e etul, á fili bo go nnya atahl abal.

⁵ Go Hebron á fili et'tohngo ji Juda nnya esehma kunu nnyahng erakera, fvfo go Jeusalem, á fili Isreel kpee a et'tohngo ji Juda eltahl a nnya ewubu a nnya era.

Devid noko ebta ga Jeusalem

⁶ Ntula Devid a ane ebe kehm song yel go Jeusalem re bo nok a anebe Jebusi ba lene o. Anebe Jebusi tongo Devid re, "A nehm yel a, jol awakamahr a abanne bahk-a ma kpar yake go." Bo tiri re Devid nehm ma yel.

⁷ Jol tvtv o Devid noko ko abuntahk Jayon, ji ji li elsi ni Devid.

⁸ Go efung enok bio, Devid bungu re, "Nne awohng awohng no bahke noko ga anebe Jebusi, á bahke toono efabe ebgba song rehng goji 'abanne a awakamahr' nyao, bo ji li anebekv ba Devid. Ji ji wahnge bo kpo bungu re, "Awakamahr a abanne nehm tiki yel go etahk Esowo*."

⁹ Devid lene o abuntahk fere lung edi jio re elsi ni Devid. "A lange ekahme kpee sennge kak bomo go edi ji bo kpu ndi kak tete rehng atahng mfam.

¹⁰ Á jo kpe gbal na fere t'tahne, tibre Jehova Esowo bi kp'fili elbung a ndi.

* 5:8 5:8 afi ekpasiki

¹¹ Hiram ntul no Taya tumu alokeltum tv Devid a akpidi nti seda, abakumu nti, abasoongo atal, bo si ekpasiki ka Devid.

¹² Owo Devid kehm kahne re Jehova me-e lim yebgbal jol ntul ka Isreel, fvfo yeb mehl ejahbe etul eje wahre, tib esi Isreel ane ebe.

¹³ Eji David mehle go Hebron song rehng Jeusalem, o Jeusalem wo David kpe ko akal a anebe elkoro gbalee, akale David baa, jele abon ka-e kpe budu, ba nlum a ba nkal.

¹⁴ Abing abon ba bo jele no, ka-e o nya a: Samua, Sobab, Natan, Solomon,

¹⁵ Ibhar, Elisua, Nefeg, Jafia,

¹⁶ Elisama, Eliada, a Elifeleti.

Devid noko ga anebe Filista

¹⁷ Eji anebe Filista wuku re Devid bo me-e bob etul go Isreel, bo kehm tahme eko eko song kehm-e elsebe, wo Devid w'wuk, á kehm tahme go edi eko ebta.

¹⁸ Anebe Filista kehm bake ba rur go edamme ji Refayim,

¹⁹ Owo Devid kehm bahbe Jehova re, "Anv, me n song nok a anebe Filistaa? Á bahke yake bo kak-m aboa?

Jehova faang-e re, " Song, m bahke lohko yake bo kak-a abo.

²⁰ Owo Devid kehm tahme go Baal Perajim, o wo á noko ga bo. Á bungu re, "Ana alahb kpo bohng lohng, Jehova ebwa bulu anebekv ebame ba yim abohng aname, owo wahngedi edi jio bo kpo lung re Baal Perajim†.

† 5:20 5:20 Ji lohngodi re, "Nsoo, no kpo ta nsol lennge gbuul"

²¹ Anebe Filista be alokelom ebo sa o, wo Devid a ane ebe kpu tahm a nya.

²² Anebe Filista kehm kpe tahm song rur go edamme ji Refayim,

²³ Owo Devid kehm bahbe Jehova, á faange re, "Ka je na je songo songo, sehng na bo go ebo a njahm, wo kehm noko a bo go mbuksong nti nyi bo kpo lung re poplar.

²⁴ A l'si w'wuk erehm eljen akpade go ero nti nyi bo kpo lung re Poplar, mehl elwaare, tibre bahke lohngo re Jehova ma-a gbo mbang re á song wul nsoja nyi anebe Filista.

²⁵ Ano wo Devid limi ana Jehova ka-e elkahn, á wulu anebe Filista kpee mbang mbang nyi bomo go Gibeon asongo go Gejer.

6

Bob ko Elkoohl Atahm ba rehng go Jeusalem

¹ Devid kpe ko ajangkun nya anebe Isreel kpee kono, bo jolo ane atahltahl nkpel atahlara a nkpel elku.

² Ye a abanoko ebta ebe kpee tahme go Baala go ejahbe Juda re bo song ko elkoohl atahm Esowo, ni bo jo lung Mbing nyia, mbing nyi Jehova ji Gbale Sehng, ye ji kun eti etul go elka elka ni eserubim go elkoohl nio.

³ Bo kunu elkoohl atahm Esowo go ejum elban-nge ji nfenfe jo lohng a ni go etahk Abinadab ji jolo go ewong. Uja abola Ahio, abon ba Abinadab, bo ba jo jen toono jo baabe ejum elbanngé jio ji nfenfe,

⁴ ana elkoohl atahm Esowo kuumu no o, Ahio wo jo jen go mbuksong ejum elbanngé jio.

⁵ Devid a anebe Isreel kpee jo geere a eko, eko ebo kpee go esamahr bi Jehova, bo jo kubu elohk, egehme gehme, ebuk, ntalehk, esoongo a akpakesang.

⁶ Eji bo ba rehng go, edi arasi aruumu ji Nakon, Uja kehm tanne abo jabbe elkohl atahm Esowo, tibre efong bi jo jen ejum elbanng ba eltuulu.

⁷ Esowo atahng rak-e tob Uja tib eji á ki tib ekpunu go ege ellimi. Owo Esowo rum-e tub ndi, á kpo o nkpe, kohlo elkohl atahm Esowo.

⁸ Devid bele erakatahng tib eji erakatahng ji Esowo gbo tub Uja, fvfo edi jio tete rehng lela bo kpo lung re, Pereji Uja*.

⁹ Devid jolo elfahle ni Jehova efung bio kehm bungu re, "Bahke limi renan, elkohl atahm ni Jehova kehm ba jol aname?"

¹⁰ We joom kor re á rod elkohl atahm Jehova, ba jol a ne go elsi ni Devid, wo á fere rod bum etahk Obed-Edom ji nnea Giti.

¹¹ Elkohl atahm Jehova sa etahk Obed- Edom nnea Giti go nnyahng na era, fvfo Jehova fuulu Obed-Edom a nlaaga enye kpee.

¹² Owo bo tongo ntula Devid re, Jehova ebfu-ulu nlaaga nyi Obed-Edom kpee a ejum ajehng ajehng ji á kpi no, tib elkohl atahm Esowo. Ano wo Devid kehm tahme re á song rod elkohl atahm Esowo go etahk ji Obed-Edom feere a ni ga elsi ni Devid go elgeere.

¹³ Eji ane ba solo elkohl atahm Esowo ma tab ekpade eljen ebrakebra, á koo nfong lim njom, a mmona nfong no joko jok.

* **6:8 6:8** Pereji Uja Lohngo re ebwa wohngo Uja

¹⁴ Á kake nkphrekahbe mbarebare ewobo ji nlimanjom kpo kak, Devid jo bahne go esamahr bi Jehova a eko eko eje kpee.

¹⁵ Eji ye, a anebe Isreel kpee jo ko elkohl atahm Jehova feere, jo rabe a eyebatahng, a ewahl atang nya bo jo wor.

¹⁶ Ana elkohl atahm Esowo jo yel elsi ni Devid, Mikal mmona Sol jo seenge sehng go mmombu nkpe ekahme. Eji ntula Devid kp'yebbe fere jo bahn go esamahr bi Jehova, Mikal ten-e ten go ege eltim.

¹⁷ Bo ko elkohl atahm ni Jehova ba kunu edi ji bo limi bum-e, go atahng ebkpatahk bi Devid si no. Devid limi njom nyi eljahme fi, a njom nyi elkoono go esamahr bi Jehova.

¹⁸ Eji á ma lim njom nyi eljahme fi, a njom nyi elkoono mal, á fuulu ane bao go mbing nyi Jehova Esowo bi kp'fili elbung a ndi.

¹⁹ Owo á ka nne awohng awohng efv nnyam ji bo wo agun, ebgbu abe, a nsahke, a nsahke nyi agreb, bo ellong anebe Isreel kpee, aneblum a anebkal anebkal. Fvfo bo ane kpee kehm tahme kehng eboa ntahk.

²⁰ Eji Devid feere no kehng re á ba fuulu nlaaga enye, Mikal mmona Sol kehm lohngo re á song wan-e, á bungu re, "Ntul no anebe Isreel ebkpunu elne lela tete, re á jol ebun ebun go esamahr alokeltum ebe ba nkal, ana nne no ki lohng ejumjum bahke limi!

²¹ Devid tongo Mikal re, "N limi go esamahr bi Jehova, ye ji yehke me, ten nso, afi nne awohng awohng ege etahk, eji á yehk-m re me n jol nne

no bahke fili Isreel anebe Jehova, m bahke geere go esamahr bi Jehova.

²² Ee, kp-m koro re me n kpe gboolo sehnga na, m bahke kpe jol daange, daange daange go egame esamahr, wo go esamahr abon ba nkal ba a bungu no, bo bahk-m jo kp'kpunu.

²³ Tib esi jia, Mikal mmona Sol tikem jel abon tete rehng efung bi á kpo no.

7

Enyam Bi Esowo nyame tong Devid

¹ Eji ntula Devid ma yel ege ekpasiki, fvfo Jehova me-e ka erekekv kpee ji anebekv ebe ba li senng kak,

² á tongo Natan nnyehnamahr re, <<Nyehn anv, me n lene etahk ji bo ko nti aseda si, gana elkohl etahm Esowo ebsa mobkpatahk.

³ Natan faange ntul re, <<Ajehng ajehng ji a kpi ega eltim, song lim ano, tibre Jehova li a na.

⁴ Atv mao Jehova kehm bungu tong Natan re,

⁵ <<Song wo song tong Devid nlokeltum ewame re, <<Ji ji a ji Jehova ma bung: Wo wo li nne no bahke sehke etahk ka-m ji m bahke lena?

⁶ Me n ka l'lene go etahk, bomo ana n yehke anebe Isreel go Ijib tete tub lela. Me n kpo kono eljene adi adi, a mobkpatahk ana edi ellene ejame.

⁷ Edi ajehng ajehng ji m ma jen a anebe Isreel kpee, me n t'tiki bung a afiladi ba n ka bo elkahn re, bo jo kpur Isreel ane ebame re, "Jenji wahnge n kala si etahk nti aseda ka-ma?" '

⁸ Anv, tong Devid nlokeltum ewame re, "Ji ji a ji Jehova Esowo bi kp'fili elbung a ndi: N yehk-a go emahng ajele, eji a jo le atohkondi, fere yehk-a re wo fili Isreel ane ebame.

⁹ Me n jol a na edi ajehng ajehng ji a ma je, me n yehke anebekv eba kpee go ega esamahr. Anv, m bahke limi mbing enya gbal, ana abing nya ane ba sahb l'li agburu ane go njini.

¹⁰ Fvfo, m bahke toobo edi ka Isreel ane ebame, m bahke bumu bo eji bo l'bel ejahbe ji bofono antahng, eji bo l'k'jo gbiingi bo. Abi ane nehm kpe jo nohk bo, ana bo limi no go mbomo.

¹¹ Fvfo bo jo limi ano wuku wuku, eji n yehke afiladi ka Isreel ane ebame. M bahke tob ka-a erekekv kpee go abo nya anebekv eba.

" Jehova lennge ka-a kpee re, yefono Jehova antahng wo, bahke limi re etul eba soro asi go ega et'tohngo:

¹² Ngare nyi afung enya ma mal, a ma song re ekv goji babnso, m bahke yehke nne ega et'tohngo, no wofona antahng jel-e no, no bahke woongo esi eja, m bahke limi etul ebe gbal.

¹³ Ye wo bahke sehke etahk go egama mbing, fvfo m bahke limi nji etul enya jol go njinanjini.

¹⁴ M bahke jolo nde, ye bahke jolo mmon ewame. Á l'lim ebi, m bahk-e kake erem ana nde nne awohng awohng kpo lim, fvfo m bahke koko abo nya nne dv-e.

¹⁵ Wo elkoro ename go ege n nehm tiki rod tahm a ni, ana n yehke goji Sol, ye ji n radd-e no fere kunu wo go ege a nji.

¹⁶ Ebangenahb eja, a efilane eja, bahke jolo ano ano go egame esamahr, eti etul eja, bahke tahne

ano ano go njinanjini.

¹⁷ Natan tooro ejum ajehng ajehng tong David ana Esowo lennge no ka-e.

Ero Bi Devid kake no

¹⁸ Owo ntula Devid kehm yele ekp'kpa, song ji esamahr bi Jehova kehm bungu re,

"Me elkohn nne awoo Jehova ji Gbale Sehng, fvfo jenji li li ebangenahb ejame, ji a ma-m fili tete rehng anv?

¹⁹ Jol jia, wa-a gbalem ega amahr Jehova ji Gbale Sehng, wob bung bade es'song bi ebange-nahb ji nlokeltum ewa, ejehke jia, Jehova ji Gbale Sehng, li ka nne noka noka.

²⁰ Jenji kpe li budu ji me, Devid bahke kpe bung tong-a? tibre wo kp'kahne nlokeltum ewa, Jehova Esowo bi kp'fili elbung a ndi.

²¹ Tib go ega ellum, fvfo, ana kor-a no, wob lim egburu ejum jia fere lennge ka nlokeltum ewa.

²² Jehova Esowo bi kp'fili elbing a ndi. A kp'lohko gb'gbal! Esowo bindiki kpeem li sehngge wo, ana wahr ma wuk egahre atung.

²³ Ane abaa li ana Isreel ane eba, ejahbe na ajehng ji li go njini, ji Esowo lohngo re á song fak ka elne, fere lim mbing ka elne, fere lim agburu amenngge akpokosi, eji á kame ajahbe yehke, a asowo ebo, go esamahr ane ebe, ba a fake bo yehke go Ijib?

²⁴ Woblim Isreel ane eba ebgbal, ana ane ba ba antahng go njinanjini, fvfo wo Jehova wobjol Esowo ebo.

²⁵ Fvfo anv, Jehova Esowo, bum enyam eba go njinanjini bi a nyame bada nlokeltum ewa, a etahk eje. Lim ana a nyame no,

²⁶ eji mbing enya bahke gbale go njinanjini. Owo ane bahke bungu re, 'Jehova ji Gbale Sehng, ye wo li Esowo ka Isreel. Fvfo nnahb nyi Devid nlokeltum ewa bahke bele atahne ega esamahr.

²⁷ "Jehova Esowo bi kp'fili elbung a ndi, Esowo bi Isreel, Wob esi lennge jia ka nlokeltum re, 'M bahke sehke etahk ka-a'. Tib esi jia nlokeltum ewa ebbel ekakeltim re á kak elkohn ero bia ka-a.

²⁸ Jehova ji Gbale Sehng, wo Esowo bi, nwongo enya lohko li etingitingi, fvfo wo wo ma nyam anoobo nsol tong nlokeltum ewa.

²⁹ Anv nong kor-a wo fuulu ebangnahb ji nlokeltum ewa, eji l'jol ano ano go njinanjini go ega esamahr, wo Jehova Esowo bi kp'fili elbung a ndi wo ma bung, fvfo go ega elfuulu, nnahb nyi nlokeltum ewa bahke bele elfuulu go njinanjini."

8

Esehng e bta ji Devid

¹ Eji ma kang, Devid noko ga anebe Filista fere rede bo, fvfo á taare Meteg Amma anebe Filista kpeem ma jo fili.

² Devid tob ga anebe Moab. Á limi aneb agbekobo noongo go ndi nti na era, á yehke bo ji jolo ngbokambang, a etoono nti wul, bo ji jolo go nti era, á yake bo jol go elkpín. Owo wahnge erik anebe Moab fere woomo go elwo ni Devid fere jo ko nsol nyi á l'bahb bo ba ka-e.

³ Fvfo Devid tob ga Hadadejer ji mmona Rehab ntul no Joba, eji á je re á feere song ko ndi go nkpe aya ma Ufrati.

⁴ Devid taar-e amvtv akuungu atahltahl nkpel ebal atahl awubu, ane ba kpo fing amvtv akuungu jolo ane atahltahl nkpel elku ebal ane atahl awubu (7000), nsoja nyi jo jen akpade jolo ane atahltahl nkpel atahl abal a nkpel ewubu. (20,000). Á yehke any'nya nya jo fing amvtv akuungu ajiki kpee, sa any'nya atahl alon.

⁵ Eji anebe Aram ba go Damaskusi re, bo ba tob Hadadejer ntul no Joba, Devid wulu ane atahltahl nkpel atahl abal a nkpel elku (22,000).

⁶ Á bumu ab'baabe go Aram, ejahbe ji etul bi Damaskusi, fvfo Aram fere woom-e go elwo jo ko nsol ba ka-e. Jehova jo ka Devid esehnge ebta edi ajehng ajehng ji á l'jee.

⁷ Devid kehm rodo akum agul nya jolo ka atubesi alokeltum ba Hadadejer ko ba a nya go Jeusalem.

⁸ Go Teba a Berotayi ajahbe nya jolo ka Hadadejer, ntula Devid koo abilikpi gbalee.

⁹ Eji Towu ntul no ejahbe Hamati wuku re Devid ebga nsoja kpee nyi Hadadejer,

¹⁰ á tumu Joram mmon ewe tv ntula Devid re á song kak-e nnyo fere tehk-e ege esehnge ebta bi á ma ga Hadadejer, ye ji jo nok ebta a Towu. Joram ko nsol nyi bo ko asilva, a agul, a abilikpi lim re á ba ka ntula Devid.

¹¹ Ntula Devid yake nsol nyia ka Jehova ana á ma tohko lim, a asilva, a agul nyako nya ajahbe nyako kpee nya á rede bo go ebta.

¹² Ane baa jolo anebe Edom a anebe Moab, anebe Amon, a anebe Filista, go anebe Amalek. Á tob yake nsol nyi á da go ebta goji Hadadejer mmona Rehob ntula Joba.

¹³ Elgahm ni Devid kehm yeere eji á kehnge enok bi á wulu anebe Edom ane atahltahl nkpel atahl abal a nkpel elon (18,000), go edamme akang.

¹⁴ Á bumu ab'baabe go Edom kpee, anebe Edom kpee fere woomo Devid go elwo. Jehova jo ka Devid esehnge ebta edi ajehng ajehng ji á l'jee.

Atubesi alokeltum ba Devid

¹⁵ Devid fili anebe Isreel kpee, á jo limi ejum ajehng ajehng ji li nseenge a ji kp'nobo ka ane ebe kpee.

¹⁶ Joab mmona Jeruya, ye wo jo kpur nsoja kpee, Jehosefati mmon no Ahilud wo jolo nne no jo nyon nsol kuuru.

¹⁷ Jadok mmona Ahitub a Ahimalek mmona Abiata bo ba jolo abalimajom, Seraya jol nnyon-awer;

¹⁸ Benaya mmon no Jehoyada, ye wo jo kpur anebe Kereti a anebe Peleti, fvfo abon ba Devid jolo abalimajom.

9

Devid tibi Mefiboseti nnoobo eljini

¹ Ntula Devid bahbe re, <<Anv nne noa no kpeka li no ma sa nlaaga nyi Sol, no m bahk-e tibi nnoobo eljini tib esi ji Jonatan?

² Ngare nyia nlokeltum no jolo ka nlaaga nyi Sol kpee, bo jo lung-e re Jiba. Bo lung-e re á je goji Devid, fvfo ntul bahb-e re, wo wo li Jibaa?

Á faange re, <<Ee, nsoo, me nlokeltum ewa wo.>>

³ Ntul kehm bahbe re, <<Nne noa no ma sa elkpín go nlaaga nyi Sol no m bahk-e ma tib nnoobo eljini ni Esowoa? Jiba kehm faange ntul re, <<Nne noa kpeka li, mmona Jonatan, yebbanne ekpade abal abal.

⁴ Owo ntul kehm bahbe re, <<Ye no na?>> Jiba faange re, <<Á li go etahk ji Makir mmona Amiyel go ejahbe ji bo kpo lung re Lo Debar.

⁵ Ntula Devid kehm tumu, bo song ko-e go Lo Debar go etahk Makir mmona Amiyel ba a ne.

⁶ Eji Mefiboseti mmona Jonatan ji mmon no Sol ba no goji Devid, á gongo ndi ka-e ekpunu. Devid re, <<Mefiboseti!

<<Á faange re, <<Ee nsoo, me nlokeltum ewa wo.>>

⁷ Devid kehm-e tongo re, <<Ka kpe fahl, etingiti, m bahk-a tibi nnoobo eljini tib esi ji nso Jonatan. M bahke feere a ndi kpee nyi jolo ka nso no nkul Sol ka-a, fvfo a bahke fere jo li nsol egame ekpukuru ngare kpe kpe.

⁸ Mefiboseti kehm gongo fere bung re, <<Nlokeltum ewa li jen, no a bahk-e liingi, ekpakv mbv ana me?>>

⁹ Owo ntul kehm lungu Jiba nlokeltuma Sol kehm bungu tong-e re, <<Me n ka mmona no mmona nso nju ewa, ejum ajehng ajehng ji jolo ka Sol a nnahb enye.

¹⁰ Wo a abon eba, go alokeltum eba, m' bahke jo bahm ndi ka Mefiboseti jo ko nsol ba a nyi, eji nsol alehke l'jol ka-e. Mefiboseti ji mmon no mmona nso nju ewa, bahke jo li nsol egame ekpukuru ngare kpe kpe. (Jiba bele abon ba nlum na elku, a alokeltum eltahl.)

¹¹ Owo Jiba kehm tongo ntul re, <<Nlokeltum ewa bahke limi ajehng ajehng ji nsoo ntul ewame ma ka nlokeltum ewe elkahn re á lim. Ano wo Mefiboseti jo li nsol ekpukuru a Devid ana mmona ntul.

¹² Mefiboseti bele njangkun a mmon no bo jo lung-e re Mika. Fvfo anebe etahk Jiba kpee jolo alokeltum ba Mefiboseti.

¹³ Mefiboseti lene Jeusalem tibere á jo li nsol ngare anyehng anyehng go ekpukuru ntul, á gbo ebanne akpade abal abal.

10

Devid gaa anebe Ammon

¹ Eji ma kang, ntul no Ammon kehm kpoko, mmon ewe Hanun ba ko nji ana ntul.

² Devid tiri re, <<M bahke tibi Hanun mmona Nahasi nnoobo eljini, ana nde tob tib-m nnoobo eljini. Owo Devid kehm tumu ane tv Hanun re bo song bung alum ekakeltim tong-e bada nde.

Eji ane ba Devid je no go ndi nyi anebe Ammon,

³ atubesi anebe Ammon tongo Hanun ji jolo nde ebo re, <<Wobbum re Devid kp'kpunu na nsoa, eji á tumu abungalum nfam tv-a re bo ba kak-a eltima? Anv, ka lohng re Devid tumu bo re, bo ba feede ejahbe, fere nyehn go elweele elweele eji bo l'ba nok a ejahbe fere koa?

⁴ Owo Hanun kehm jabbe aba tiingi etib ba Daivd, no nne bo kpud-e ejang elahng ajehng, fere kiimi akpawobo ebo, go ekidi atanahb, kam bo re bo song.

⁵ Eji bo tongo Devid bade ano, á tumu atiatingi etib tv ane bao, tib bo sono bo sehng. Ntul bungu re, "Saan go Jeriko tete alahng enyahne tahb, wahn kehm bake.

⁶ Eji anebe Ammon kahne re, bob lim Devid ebbel erakatahng, bo kehm song yaame nsoja atahltahl nkpel atahl abal a nkpel ewubu (12,000) nyi anebe Aram nyi jo jen akpade, nyi lohng go Beti Rehob a Joba, tob rehng goji ntul no Maaka ko ane atahltahl nkpel ebal atahl awubu, (1000) fvfo tob song ko ane atahltahl nkpel eltahl a nkpel ewubu (12,000) ba lohng go Tob.

⁷ Devid wuku kan ano, á kehm tumu Joab re á lohng a ane kpee ba kpo nok ebta.

⁸ Anebe Ammon kehm ba rur go eti mbu ji ejahbe ebo, gana anebe Aram ba lohng go Joba a Rehob, a ane ba Tob a Maaka, bo jolo ebo ebo go ndi nyi li gbuul.

⁹ Joab nyehne kan re, anebe ebta li-e go es'song a ejahm, owo á kehm yehke nlong nyi kp'sahb t'tahne go ellong anebe Isreel re bo song nok a anebe Aram.

¹⁰ Á jabbe erik ane bako ka Abisayi ji mmonan-nyehn re bo ba bahke noko a anebe Ammon.

¹¹ Joab kehm bungu tong Abisayi re, <<L'jol re anebe Aram yahke tahne sehng-m, baan wahn ba tahr-m, wo l' fere jol re anebe Amon yahke tahne sehng-n, m bahke bake ba tahr-n.

¹² Bel etahne eltim wahr nok esahb esahb ka ane ebahre a ajahbe nya Esowo ebahre. Jehova bahke limi ji nobo no ege esamahr.

¹³ Owo Joab a nlong nyi jolo a ne kehm tahme kehme elnoko a anebe Aram, anebe Aram be go ege esamahr.

¹⁴ Eji anebe Amon sebe kahn re anebe Aram kp'beke, bo go tob be esamahr bi Abisayi feere yel atahng ejahbe. Owo Joab kehm kehng enok bi a noko a anebe Amon ba go Jeusalem.

¹⁵ Eji anebe Aram nyehne re anebe Isreel ebwul bo gbalee, bo kehm kpe lung elbo ba kono asi.

¹⁶ Hadadejer tongo bo, bo ko anebe Aram go egbuk aya ma Ufrati, bo tahme go Helam, Sobak ji jolo ntubesi a nsoja nyi Hadadejer ye wo jo fili bo.

¹⁷ Eji bo tongo Devid ejum jia, á lungu anebe Isreel kpee kono edi ajehng, bo tahm siiri aya Jodan tahm go Helam. Anebe Aram kono elbo re bo song kpiri Devid nok ebta a ne.

¹⁸ Wo bo be esamahr anebe Isreel, fvfo Devid wulu ane atahltahl atahlku (700), bo ji jo fing amvtv akuungu ebo tob wul nsoja ebo nyi jene akpade ane atahltahl nkpel atahlabal (40,000). Á tob wulu Sobak ntubesi a nsoja ebo a kpo edi jio.

¹⁹ Eji atul kpee ba jo loko Hadadejer nyehne re anebe Isreel ebsehng bo go ebta, bo fere lim elkoono, fere woomo bo go elwo.

Tib esi jio ji wahng anebe Aram jo fahl re bo kpe kak anebe Ammon ebo nkpel anyehng anyehng.

11

Devid abola Betiseba

¹ Ngare nyi nale ma ba, ngare nyio nyi atul kpo lohng song nok nta, Devid tumu Joab a atubesi nsoja enye, go nsoja nyi anebe Isreel kpee. Bo song nok ga anebe Ammon fere sennge Raba kak. Wo Devid tiki jolo go Jeusalem.

² Elgung anehng Devid mehle ege edilnong jo jen ege elbulu sennge ekpasiki. Eji á jolo elbulu wo á nyehne nnenkal kp'wumu alahb, nnenkal noo nobo area.

³ Devid kehm tumu nne re á seb kahn bade a ne. Nne noo ba tong-e re, <<Nnenkal noo bo kpo lung-e re, Betiseba, mmon no Eliam, nkal no Uriya nnea Hiti.

⁴ Owo Devid kehm tumu ntiingi etib re bo ko-e ba a ne. Á lohko ba ege, á noongo a ne. (Ngare nyio á jo wumu alahb bum elne saang, tibre ngare nyio alung m-e mal) Á feere eje kehng.

⁵ Nnenkal noo sa ela, tum etib tv Devid re, <<Me n sa ela.>>

⁶ Owo Devid kehm tumu ellum nia tv Joab re, <<Tum Uriya nne a Hiti tv-m.>> Joab soro tum Uriya tv Devid.

⁷ Eji Uriya ba go ege, Devid bahb-e ana Joab li no, ana nsoja tob li, fvfo ana ebta kp'noko asongo.

⁸ Owo Devid kehm tongo Uriya re, <<Song ega etahk wo song re ekv.>> Uriya kehm lohngo ekpasiki, fvfo ntul limi nnoobo tum ejum tv-e.

⁹ Wo Uriya kange o mbuga mi ekpasiki a alokel-tum nde kpee, á jeem go ege etahk.

¹⁰ Bo t'tong Devid re, <<Uriya jeem go etahk.<<Owo á kehm bahbe Uriya re, <<Nde

á kpehna lohngo go ebud nsoja abake? Jenji wahnge a ki je etahk?

¹¹ Uriya tongo Devid re, <<Elkohl atahm, a anebe Isreel, go anebe Juda wob go ebehre, ntubesi ewame Joab a ane ba nsoo ewame bo li go emahng gbul gbul gbuul. Jenji wahnge m bahke jeke egame etahk song li fere w'wo, lim elkoro a nkal ewame? Go etingitingi, ana wo li go elkpin, me n nehm lim elkohn ejum ana jia.

¹² Owo Devid kehm-e tongo re, <<Jol a efung abehng, behna m bahk-a tumu á feere. Uriya jolo o Jeusalem efung bio a njahm efungfu nyehko.

¹³ Devid lung-e a song li nsol a ne fere w'wo, fvfo Devid lim-e á wo jo buumu. Wo eji elgung ba no, Uriya lohng tahm song noongo ege ekpa semme alokeltum nde, á jeem ege etahk.

¹⁴ Efungfu Devid nyono nwer tv Joab, nyi á ka Uriya re á song ka-e.

¹⁵ Go nwer nyio á nyono re, "Tum Uriya tv go mbuksong ebta bi kp'sahb f'fub, tahm-e sa eji bo l'rum-e tub go á kpo.

¹⁶ Wo eji Joab ma tum nsoja sennge ejahbe kak, á tumu Uriya tv edi ji á k ahne re ane ba kp'sahb t'tahne go ebta li no.

¹⁷ Eji ane ba ejahbe jio lohngo ba re bo ba nok a Joab, egom ellong ane ba nsoja nyi Devid bo w'wul bo, fvfo Uriya nnea Hiti tob kpo.

¹⁸ Joab tumu etib kpee ana ebta jolo no tv Devid.

¹⁹ Joab tubu ntiingi etib elle re, á l'tooro mal tong ntul ana ebta li no,

²⁰ ntul atahng bahk-e rake, á bahk-a bahbe re, 'Jenji wahnge n sahbi j'jeere kohlo ejahbe song

nok? N kahn-m re, bo bahke take mban sehng go nnyo ekahma?

²¹ Nne awoo wulu Abimelek mmona Jerub-Beseti? Nnenkal sang yake egburu eltal go ero ekahme tub-ea, wahng ka á kpo go Debejia? N'nan n sahba k'kabbe go ekahme? Á l'bahb-a jia, tong-e re, <Fvfo Uriya nlokeltum ewa nnea Hiti ebkpo.> >>

²² Ntiingi etib noo mehle eljen, á rehng kan a me, á kehm tongo Devid ejum ajehng ajehng ji Joab tum-e no re á ba tong-e.

²³ Ntiingi etib tongo Devid re, <<Ane bao tahne sehng-r, bo lohngo gbuul ba kehme elnoko anahre, wo e kame bo feere eti mbu ji Ejahbe.

²⁴ Owo at'take kehm sake go ekahme ta alokel-tum eba elban, ane bandiki ba ntul kpo, fvfo Uriya nlokeltum ewa nnea Hiti ebkpo.

²⁵ Devid tongo ntiingi etib re, <<Tong Joab ejum jia re, 'Ka taame ejum jia gbiing-a eltim, ekahngkahng kpo wul nne ano fere tob wul noko. Nok song g'gingi wo ranng ejahbe jio, tong-e ano, wo kak-e eltim.

²⁶ Eji nkala Uriya wuku re nlum ewe ebkpo, á lingi noongo elkv.

²⁷ Eji á ma noongo ngare ma sehng, Devid tongo re bo ko-e ba ege etahk, á ba jolo nkal, jel mmon no nlum ka-e. Wo ejum ji Devid limi no Jehova atahng we-e yebem.

12

Natan nyame Devid

¹ Jehova tumu Natan tv Devid. Eji á je go ege, a bungu re, <<Ane abal jolo go ejahbe ajehng, noko jolo efangene, noko jolo nkpak.

² Efangene bele egburu ellong ejoro a efong,

³ wo nkpak belem ejumjum, sehngem mmons'sohko mmona njoro wo á gunu no. Á tohk-e tete á gbal ka-e, a abon ebe, bo jo li nsol ano edi ajehng a nenlum noo, fere jo wo alahb go egea nkob, jol á tob jo lale ege abo. Á jolo ana mmon no nkal ka-e.

⁴ Owo njenne kehm bake goji efangene jio, efangene jio sahbem yehke njoro anyehng, afii nfong anyehng ko lam nsol ka njenne nyi ba go ege. Ji á limi no, á song rodo mmonanjoro no jolo ka nkpak ba lam nsol ka njenne nyio.>>

⁵ Devid atahng kehm-e rake tob efangene jio, á kehm tongo Natan re, <<Etingitingi ana Jehova li go elkpin, nne no limi ejum ana jia bahke tiki kpo.

⁶ Á bahke gale njoro nyio nkpel eni budu, tib eji á limi ejum jia, á ki be ndon.

⁷ Owo Natan kehm tongo Devid re, <<Wo wo li nne noo! Ji ji a ji Jehova, Esowo bi anebe Isreel kp'bungu, <N kun-a etul ka Isreel, n fere tahr-a yehke go abo nya Sol.

⁸ N ka-a nlatahk nyi nso ewa, fere yake akal nso kak-a go ebo. N ka-a Isreel kpee, a Juda. L'jol re nyaa ma-a se sehng, n jol-a ma ka budu.

⁹ Jenji wahnge a tene ellum ni Jehova, eji á limi ji jolo eb'bi go ege elbohngo? A rumu Yuriya nnea Hiti go ekahngkahng, fere ko nkal ewe á jol nkal ewa. Wo wulu Uriya nnea Hiti go ekahngkahng bi anebe Amon.

¹⁰ Anv kahn re ekahngkahng nehm tiki lohng ega nlaaga, tibre a ten-m ten, fere rod nkala Uriya nnea Hiti á jol nkal ewa.'

¹¹ "Ji ji a ji Jehova kp'bungu re, ' Ega nlaaga wo m bahke melle erem ka-a. M bahke rodo akal eba ega esamahr ka nne no li kohl-a, á bahke jo noongo a akal eba njul kpaang.

¹² Wo limi ejum jia mbiiri, wo me, m bahke limi njul kpaang, go esamahr anebe Isreel kpee.' "

¹³ Owo Devid kehm tongo Natan re, "Me n lim abiafem tob Jehova." Natan faang-e re, "Jehova ebtahm ka-a go ega abiafem. Á nehm kpe kpo.

¹⁴ Wo tib eji a ma lim jia, woblim edaangene tob Jehova, mmon no bo jele ka-a, bahke kpoko."

¹⁵ Eji Natan ma tahm kehng, Jehova kehm rumu mmon no nkala Uriya jele no ka Devid, á kehme elyame.

¹⁶ Devid gboongo Esowo ka mmon noo. Á bade njal, atv gbalee á jo noongo ndi a agbajake nsol.

¹⁷ Anebkul ba nlaaga enye jo yiim-e go ng-baange re bo mehl-e yiimi, wo á jo t'ten, jol á joom taame li ejum ajehng ajehng a bo.

¹⁸ Eji ma kang nfung esehma mmon noo kpo. Alokeltum Devid f'fahl re bo tong-e re, mmon ebkpo, bo tiri re, <<Eji mmon jolo elkpín, á wahr wukem, eji e jo bung a ne. E bahke limi renan, anv, kehm-e tongo re mmon ebkpo? Á bahke ma lim elne ejum.>>

¹⁹ Devid s'seb kahn re alokeltum ebe kpi aw'wa bung atemtem, fvfo á k'kahn re mmon ebkpo. Á kehm bahbe re mmon ebkpoa? Bo faange re <<Ee, yebkpo.>>

²⁰ Owo Devid kehm mehle go ndi. Eji á ma wuumu alahb taame akehng fere yaange nsol ebjing, á tahme go etahk Jehova song kak Esowo. Owo á kehm feere kehng ege etahk, kehm bahbe re bo ka-e nsol alehke, á kehm lehke nsol.

²¹ Alokeltum ebe kehm-e bahbe re, <<Jenji wahng a kp'limi ana? Eji mmon jolo go elkpin, a jo bade njal fere jo ling, wo anv eji mmon ma kpo, wob mehl kp'lehke nsol.>>

²² Á faange re, "Eji mmon jolo go elkpin n jo bade njal, fere jo ling, n tiri re nne awoo kp'kahne? Fundiki Jehova m bahk-e fili ndon, á yake mmon a jol elkpin.

²³ Wo anv, eji á ma kpo, jenji wahng m bahk kpe jo bade njal? M bahk-e ma kpe ko feere a nea? M bahke jeke na go ege, wo ye nehm ma kpe feere ba ga egame.

²⁴ Owo Devid kehm kake Betiseba nkal ewe eltim, fere tahm song lim elkoro a ne, á jel mmon no nlum no bo gung-e mbing re Solomon. Mmon noo jo koro Jehova;

²⁵ Tib eji á jo kor Jehova, á tumu ellum sehng goji Natan nnyehnamahr re bo jo lung-e re Jedidaya*.

Devid ko ejahbe Raba

²⁶ Gana Joab noko a Rabba ji jolo abuntahk ejahbe anebe Amon taare ekpasiki.

²⁷ Owo Joab kehm tumu ntiingi etib tv Devid, á bungu re, <<Me n nok a ejahbe Rabba fere taare adi alahb ebo.

* 12:25 12:25 Jedidaya lohngo re ye ji jo koro Jehova

²⁸ Anv, ku erik nsoja nyehko kono edi ajehng, bo song jol sennge ejahbe kak fere ko. Tohko jol ano, me m bahke koko ejahbe fere jo lung kpiidi egama mbing.

²⁹ Owo Devid kehm kuku nsoja nyehko kpee bo tahm go Rabba, song nok ko edi jio.

³⁰ Devid laade ntul abo ekpasi, feere konngo elne, bo l'dumu bake lubu ana eltahl ekilo elku, jo lubu ana ebahk agul. Bo ko atal nya nno a nno lim. Devid daa nsol gbalee go ejahbe jio,

³¹ fvfo á yehke ane ba jolo ejahbe jio, fere kak bo eltum nti ayange, eltum akuungu alimi, eltum akuungu nfuk alimi, fere jo lim eltum ab'lok nya bo kpo wo go agun. Ana wo Devid limi ajahbe nya anebe Amon. Devid kehm feere kehng go Jeusalem, a nsoja enye kpee.

13

Amnon a Tamar

¹ Absalom mmona Devid bele nnooba mmonnanyehn no nkal no bo jo lung-e re Tamar, eji ma kang Amnon mmona Devid noko kehm gboko elkoro a Tamar, á jolo mmonnanyehn no nkal no Absalom.

² Amnon elkoro nia gbal-e sehng ni á bele a Tamar nfun ewe, wahngé á gbo eyam go nsahm. Tibre Tamar jolo mmongungu nnenkal, fvfo jolo ejahkjahk ejum ka Amnon re á lim-e elkohn ejum ana jia a ne.

³ Amnon bele ekpondahme ji bo jo lung-e re Jonadab ji mmon no Simea, mmonnanyehn Devid. Jonadab jolo ewake wake nne.

4 Á bahbe Amnon re, <<Jenji wahnge wo ji li na mmona ntul, á kp'guunu efung efung? Á me-e nehm tonga?

Amnon kehm-e tongo re, <<Me n gbo elkoro a Tamar mmonannyechna Absalom ji mmonannee.

5 Jonadab kehm-e tongo re, <<Song noongo edilnong wo jo lim awak re a kp'yame, ngare nyi nso ewa l'ba re á ba nyehn-a, tong-e re, <N kp'sebe re mmonannee Tamar ba, ba ka-m ejum alehke me n li. Nong á ba lam nsol alehke nyia egame esamahr me n nyehn fere li nsol nyio ege ebo.>>>

6 Owo Amnon kehm noongo jo lim awak re á kp'yame, eji ntul ba re á ba nyehn-e, Amnon kehm-e tongo re, <<Bahk-m koro re Tama mmonannee ba, ba lim ekahme kahme ebred egame esamahr, eji m bahke lehke ege abo.

7 Devid tumu ellum tv Tamar go ekpasiki re, <<Song etahk Amnon ji mmonanne, wo song lam nsol alehke ka-e.>>

8 Owo Tamar kehm tahme go etahk Amnon ji mmonanyehn, ye ji noongo ndi. Á kehm song rod ekpingi kak abe nyoodo kpee lim ebred jio ege esamahr.

9 Owo á kehm rodo ekpingi kak ebred jio song ka Amnon, á ten ellehke,

Owo Amnon kehm tongo nne awohng awohng re bo lohng song. Ano wo nne awohng awohng lohke lohng sa.

10 Owo Amnon kehm tongo Tamar re, <<Ko nsol alehke ba ka-m egame ekp'kpa elkang, eji n l'li ega ebo. Tamar lohko ko ebred jio ji á ma lim re á song ka mmonannyechn Amnon go ege ekp'kpa elkang.

11 Eji á ko song ka-e re á li, á kehm-e tubu ejahm fere bung re, <<Noongo aname mmonannee.>>

12 Tamar tong-e re, <<E'ee mmonannee, ka ma bob na, elkohn ejum ana jia fuumem re lim a Isreel! Ka lim ebi ejum ana jia.

13 Me mee? Gan wo m bahke behre esono ejame? Wo fvfo mee? A bahke jolo ana egboolo nne go Isreel. Titi song bung a ntul, á nehm ten re me n ki-a bal.

14 Wo á t'ten, atung á wuungem, eji jolo re, Amnon tahne sehngé, á tiki bob-e noongo a ne.

15 Amnon fere ko-e ekv ji sahb t'tahne. Etin-gitingi, eltehne ni á jo tehn Amnon gbale sehngé elkoro ni á jo kor-e. Amnon tong-e re, <<Mehl, wo lohng song!>>

16 Á tong-e re, <<E'ee! Eltongo ni á kp-m tongo re me n song li egburu elsoodo sehngé ji á ma-m si l'lim.

Wo á t'ten, atung á we-e wuungem.

17 Amnon lungu nlokeltum ewe fere tong-e re, <<Yehke nnenkal noa egame esamahr, wo kak ebi go mbu tv-e go.

18 Ano wo nlokeltum ewe yehk-e yake go fere kak ebi mbu tv-e elatahk. Á kake ekpa ewehre ji jolo agane agane, tib elkohn ekpa ewehre ji a ji abongungu abon ba nkal mmona ntul kpo kak.

19 Tamar kake atong go ege esi, fere yare ekpa ewehre agane agane ji á kake no. Kunu abo ege esi lohng tahm jo ling wahre wahre ana á jo jen asongo.

20 Absalom mmonannyehn kehm-e tongo re, <<Eblohng re Amnon jio ji mmonanne, wo ma

ko eko noongo a naa? Tohko belle, mmonannee, ye mmonanne wo. Ka rod ejum jia kak eltim. Tamar jolo etahk Absalom mmonannyehn antahng ndon ndon.

²¹ Eji ntula Devid wuku nsol nyia kpee, atahng rak-e sehng.

²² Absalom tikem bung ellum tong Amnon, jolo eno afi ebi, á koo Amnon ekv tib eji á ma sono Tamar mmonannyehn.

Absalom wulu Amnon

²³ Eji ma kang nnya ebal, ngare nyi bo jo kpud ejoro bi Absalom anyar go Baal Hajor kohlo nkonandi nyi Efrim, á tiingi abontul ba nlum kpee re bo je.

²⁴ Absalom kehm jeke goji ntul, song tong-e re, <<Nlokeltum ewa, ngare ebrehng nyi á yahke kpud ejoro anyar, bahke koro ntul a alokeltum ebe re, bo tob ba jol anama?>>

²⁵ Ntul kehm faange re, <<E'ee mmon ewame, wahr ane kpee e nehm je go, e bahke jolo ana elsol ka-a.>> Jol ana Absalom tiki fann-e re á je, á t'ten eljeke, wo elfuulu ene ni á ka-e no.

²⁶ Owo Absalom kehm buntu re, <<Tohko fere jol ano, nong Amnon mmonannee ba anahre go. Ntul kehm-e bahbe re, <<Jenji wahnge á kp'sebe re á ba toon-a?>>

²⁷ Wo Absalom tiki fann-e, owo á kehm tongo Amnon a erik abontul re bo je.

²⁸ Absalom ka ane ebe elkahn re, <<Wuungen atung! Eji Amnon ma wo amahm kpe-e limi, n l'tong-n re, <Rumen Amnon tub,> wulen ye, kana

fahl. Me sang ma-n ka elkahna? Belen etahne eltim, wahn bel esahb.>>

²⁹ Ano wo ane ba Absalom limi Amnon ana Absalom ka bo elkahn. Owo abontul kpee kehm mehle tahm kuumu ebo ebvankkang be tahm.

³⁰ Eji bo fi mbang, etib kehm song kpiri Devid re <<Absalom ebwul abontul kpee, jol na awohng saam.>>

³¹ Ntul kehm mehle yiimi, yare nsol enye fere gbo noongo ndi, ane ebe kpee tob yare nsol ebo fere ba yiimi a ne o.

³² Wo Jonadab ji mmon no Simea, ye ji jolo mmonannyehn no Devid bungu re,<<Nsoo ewame, ka tir re bob wul abontul ba nlum kpee, sehngem Amnon wo wo ma kpo. Absalom ebkud jia kak ala re á lim ejum jia, bomo efung bi Amnon bobo Tamar mmonannyehn noongo a ne.

³³ Nsoo ntul ewame, ka tiiri bade etib bi ba no re, abontul kpee ebkpo. Amnon ntahng ntahng wo ma kpo.>>

³⁴ Gana Absalom ebbe fi. Nne nsoja no yiimi o jo kpur, á nyehne ane gbalee go mbang, ejang erede mfam ebe, kp'bake nkpe ewong. Ye ji jo kpur, wo song tong ntul re, n nyehne ane kp'lohngo go ejang bi Horonayim go nkpe ewong.>>

³⁵ Jonadab kehm tongo ntul re, nyehn abontul go ma ba, eblohko jol ana nlokeltum ewa ma bung.

³⁶ Ana á bungu no mal, abontul ba yel, kp'lingi wahre wahre. Ntul fvfo a ane ebe kpee, lingi sahb m'maange bo.

³⁷ Absalom be tahm goji Talmayi mmona Amihud, ntul no Gesur. Wo ntula Devid noongo elkv afung tvv esi mmon ewe no nlum.

³⁸ Eji Absalom ma be tahm go Gesur, á jolo o nnya era.

³⁹ Eji ntula Devid ma noongo elkv mal ni mmon ewe Amnon, á jo sebe re á je song nyehn Absalom, tib bo me-e kak eltim bade elkv Amnon.

14

Absalom Feere kehng Jeusalem

¹ Joab ye ji nyehn bo jo lung-e re Jeruya k'kahn re, eltim ni ntul eblohng tonngo re á nyehn Absalom.

² Owo Joab kehm tumu nne tv go Tekoa re bo ko nnenkal no jo sahb b'bang o ba a ne. Á tong-e re, <<Jo lim awak re a nong elkv, kak nsol elkv anoongo, ka kak akehng go esi, jol taame na. Jo lim ana nnenkal no ma kang afung tvv go elkv anoongo.

³ Fvfo song goji ntul, wo song tong-e alum nya m bahk-a tongo. owo Joab kehm tongo nnenkal noo alum nya á sebe re á tong ntul.

⁴ Eji nnenkal no lohng go Tekoa jee no goji ntul, á gbo kohk esamahr go ndi ka-e ekpunu, á bungu re, <<Kak-m ebo nso ntul!>>

⁵ Ntul bahb-e re, <<Jenji kpa-a gbiingi?

Á kehm bungu re, <<Me nkalebun wo, nlum ewame ebkpo.

⁶ Me nlokeltum ewa kpi abon ba nlum abal. Bo kehme abohng nok atemtem go edi egbe, nnene jolem no bahke yaame bo. Noko rumu ntem wul.

⁷ Anv ejahbe kpee ebmehl nfem bade a nlokeltum ewa, bo kp'bungu re, <Yake mmon noa no rumu mmonannyehn tub ndi ka-r, eji e l'tob wul-e go esi elkpin ni mmonannyehn ewe no á wul-e no, l'jol ano wahr ebtob ranng nlehelkv fvfo.> Bo bahke lahme akalengun enyame nya ma sa, jol mbinga nlum ewame, a et'tohngo eje ebtan esamahr njini.>>

⁸ Ntul kehm tongo nnenkal noo re, <<Song kehng, m bahke kake elkahn bade o ega esi.

⁹ Wo nnenkal no lohng go Tekoa tong-e re, <<Nong nso ntul ewame ny'nehm ndon a nnahb enyame, nong ntul a eti etul eje jol k'bel ebi.

¹⁰ Ntul kehm faange re, <<Nne awohng awohng l'bung ejum ajehng ajehng tong-a bade ejum jia, ko bo ba ka-m, bo wa-a nehm gbiingi.>>

¹¹ Nnenkal noo bungu re, <<Nong ntul gboongo Jehova Esowo ebe, á sahde mb'bongo alung á k'kpe kpele go elranng ni ma jol, eji bo l'k'ranng mmon ewame.

David kehm bungu re, <<Etingitingi ana Jehova li elkpin, jol ellv esi na anehng ni mmon ewa nehm gbo ndi.>>

¹² Nnenkal kehm noo re, <<Nong nlokeltum ewa bung ellum anehng tong nsoo ntul ewame.>> Ntul kehm faange re <<bung.>>

¹³ Nnenkal kehm bungu re, <<Jenji wahng á ma tir ejum ana jia bade aneb Esowo? Ntul l'bung ana, á ka elne ebia, tibre ntul ka tiki ko mmon ewe no bo ten-e tv go feere a nea?

¹⁴ Ana alahb kpo lamme yel ndi, a nehm ma kpe nyehn, ano wo wahr bahke kpoko. Wo ano sang Esowo toobo no, sehngem re, á toobo abang eji

nne no bo me-e ten tv go l'k'sa go eltene nio, bo bahke feere a ne.

¹⁵ <<Anv me m ba re me m ba bung jia tong nsoo ntul ewame, tibre ane ma-m lim me n fahl. M nlokeltum ewa tiri re, <M bahke bungu a ntul; fundiki á bahke faange ji nlokeltum ewe bahbe no.

¹⁶ Fundiki ntul bahke taame tahre nlokeltum ewe go ebo bi nne no kp'gare re á yehk-r, me a mmon ewame go elehkelkv ji Esowo.>

¹⁷ <<Fvfo anv m nlokeltum ewa n kp'bungu re, <Nong ellum ni nsoo ntul ewame bel ekakeltim egame elehkelkv, tibre nsoo ntul ewame li ana enjel nyi Esowo go elfeede ji kp'nobo, a ji li ebi. Nong Jehova Esowo eba jol a na.> >>

¹⁸ Owo ntul kehm bungu tong nnenkal re, <<Kam-a behr nfaange go ejum ji n yahk-a bahb. Nnenkal kehm bungu re, <<Nong nsoo ntul ewame bung.>>

¹⁹ Ntul kehm bahbe re, <<Lohkem li re ebo bi Joab wob a na go ejum jia kpeea?>>

Nnenkal kehm faange re, <<Etingitingi ana a li go elkpín, nsoo ntul ewame, nnene nehm senngé feere ejang eboblum afii ejang ebobkal go ejum ajehng ajehng ji nsoo ntul ewame kp'bungu. Ee! lohko li Joab nlokeltum ewa, ye wo tub-m elle re, me n lim jia, fvfo ye wo kake alum nyaa go nnyo mi nlokeltum ewa.

²⁰ Joab nlokeltum ewa limi jia re á yaange eljini ni yake jol a. Nsoo ntul ewame kpi ngbere ana nyio nyi enjel Esowo, á kp'kahne ejum ajehng ajehng ji kp'limi a ndi nyia.>>

²¹ Eji ma kang, ntul kehm tumu tv Joab re, <<Ebnob sehng, m bahke limi ano. Song wo song

ko njangkun nyio Absalom feere a ne.>>

²² Joab kehm gboko kohk esamahr go ndi ka-e ekpunu, fere bungu re, <<Esowo fuul-a ntul, Lela me nlokeltum ewa me n kahn re me n bel ndon ega esamahr, nsoo ntul tibre ntul wobfaange ji nlokeltum ewa bahbe no.>>

²³ Owo Joab kehm tahme go Gesur song ko Absalom, feere a ne go Jeusalem.

²⁴ Wo ntul bungu re, <<Á song ege etahkoo , á k'nyehn esamahr ebame.>> Absalom lohko tahm ege etahk, á lohkem nyehn esamahr ntul.

²⁵ Go Isreel kpee nnene tikem jol no bo sahb tehk-e tehk ege ano sehng Absalom. Bomo ege esi tete ba rehng ndabkpade elem ajehng ajehng we-e jolem.

²⁶ Á jo kpudu alv esi enye nkpel anyehng go elya, tibre l'tahb jo lub-e lub. Ngare anyehng anyehng nyi á l'kpud alv esi enye, á l'dumu, jo lubu rehng ekilo ebbal kunu esi, go edumu ji ntul.

²⁷ Absalom jele abon ba nlum na ara, mmon no nkal awohng, mbing enye bo jo lung-e re Tamar, Á gbo egbahme sehng.

²⁸ Absalom lene go Jeusalem nnya ebal, á tikem nyehn esamahr bi ntul.

²⁹ Owo Absalom kehm tumu nne tv re bo lung Joab eji á l'tum etib tv ntul. Wo Joab ten eljeke goji Absalom, á kpe tum etoono nkpele, á tiki ten á jeem.

³⁰ Owo á kehm tongo alokeltum ebe re, <<Nyehnen egbe ji Joab li kohlo ejame, nkohl nyi bo kpo lung re abali li o, songen wahn song jahm

agun.>> Owo alokeltum Absalom kehm lohko song kak agun.

³¹ Owo Joab kehm tahme etahk Absalom, á tong-e re, <<Jenji wahnge alokeltum eba ma kak agun egame egbe?>>

³² Absalom tongo Joab re, <<Nyehnee n tumu etib tv-a re bo lung-a wo ba eji n l'tum-a tv ntul, re wo bahb-e ji wahnge n lohngo go Gesur ba a. Jol ga nob ka-m li re n sa go Gesur! Anv n kp'sebe re me n nyehn esamahr bi ntul, l'jol re me n li ebi ajehng ajehng, nong á wul-m.>>

³³ Owo Joab kehm tahme song tong ntul jia. Ntul kehm lungu Absalom, á kehm bake ba yel gong esamahr ebe go ndi go esamahr ntul. Fvfo ntul kehm bingi Absalom fere vvr-e.

15

Absalom Lame Kak Ntul

¹ Eji ma kang, Absalom toobo mmvttv akuungu ka elne a any'nya go aneblum atahl abal ane awubu ba bahke jo gbo-e mbang asongo edi ajehng ajehng ji á fi no.

² Á jo kono elyahme efungfu behre behre, song yiimi go nkpea mbang nyi li rehng eti mbu ji ejahbe. Ngare anyehng anyehng nyi nne l'ko nfem re a ba tong ntul, eji bo l'toobo, Absalom bahke lungu nne noo bahb-e re, <<Esi ejahbe ajii a lohng no?>>Á bahk-e faange re, <<Nlokeltum ewa lohng go et'tohngo ajehng ji anebe Isreel.>>

³ Absalom bahk-e tongo re, <<Nyehne, elam eja li go nseenge, fvfo kp'nobo, wo nnene limm no yim enyo ji ntul no bahk-a wuku.>>

⁴ Absalom jo bungu budu re, li re bo ma-m yehke ana nlamalam go ndi nyia! Owo nne awohng awohng no l'bel nfem afi elam l'ba egame, m bahke lame elam ebo ka bo go nseenga nseenge.

⁵ Ano wo nne awohng awohng no l'jen kohl-e re á gong kak-e, Absalom bahke tanne ebo jabbe, fere bing-e.

⁶ Mbang nyia nyi Absalom jo lim ka anebe Isreel kpee ba jo je goji ntul jo seb re bo li eno go alam, ana wo á limi no, jol gaam kang Absalom jo koro nne awohng awohng go Isreel sehng ntul.

⁷ Eji nnya eni ma mal, Absalom tongo ntul re, <<Nong me tohko je go Hebron song lim ana n ko nwongo tong Jehova.

⁸ Eji nlokeltum ewa jolo go Gesur ejahbe Aram, n ko nwongo nyia re, <Jehova l'ko-m feere aname go Jeusalem, m bahke song kak Jehova go Hebron.

⁹ Ntul tong-e re, <<Song go elkoono.>> Owo á kehm tahme go Hebron.

¹⁰ Absalom tumu atiatingetib mbehr mbehr tv at'tohngo kpee nya Isreel re, <<Ana á l'soro w'wuk bo ma wor atang, bungen re, <Absalom ebjol ntul go Hebron.> >>

¹¹ Ane atahl awubu ba lohngo Jeusalem toono Absalom. Bo tiingi na bo, bo jolo ekpehle ekpehle, fvfo bo tahme, jol bo kahnem ejumjum bade nfem nyia.

¹² Eji Absalom jo lim ajomjom, á tob tumu tv Ahitofel nnea Gilo, ntubelle no Devid re, á lohng go Gilo ji jolo ejahbe eje ba. Fvfo ebi ntoobo nyi Absalom bele atahne, ane ba jo toono Absalom jo

kpe rur na.

Devid be lohng nfam sa

¹³ Ntiingetib kehm bake ba tong Devid re, <<Ntim nyi anebe Isreel anv li ka Absalom.

¹⁴ Owo Devid kehm tongo atubesi abalimeltum ebe kpee bo ji jolo a ne o Jeusalem re, <<Baan! Wahr been, tohko jol ano, nne ewahre awohng awohng nehm for abo nya Absalom. Wahr tahmen tvtv, tohko jol ano á bahke bake elwaare ba gbiir-r akpade, ko nfem ba ka-r, ko ewul ba ka ejahbe ejahre.

¹⁵ Atubesi abalimeltum kehm-e faange re, <<Wahr alokeltum eba kp'siki na re, ejum ajehng ajehng ji nsoo ntul ewahre l'bung wahr lim.>>

¹⁶ Ntul kehm mehle asongo, nlaaga enye kpee jo toon-e, wo á tahme nkoro enye ane awubu sa re bo jo kpur ekpasiki.

¹⁷ Owo ntul kehm mehle asongo a ane kpee ba jo toon-e, bo tohko sa yiimi go es'kohro etahk go ejahbe.

¹⁸ Ane ebe kpee ba sehng gbo-e mbang, a anebe Kereti a Peleti kpee; go anebe Giti, ane atahltahl atahlawubu kpee ba toon-e go Gati ba, gbo ntul mbang.

¹⁹ Ntul tongo Itayi nnea Giti re, <<Jenji wahnge á kp-r toono? Feere song wo song jol a ntula Absalom. Wo nne ajahmjahm wo, no ma be ejahbe eje sa.

²⁰ Nyaane nyaane wo á ba no. Fvfo lela me n rod-a jo beeme a nahra adi adia, eji me n kil kahne edi ji n fi noa? Feere song wo song rod

ane eba song. Nong Jehova tib-a nnoobo eljini a etingitingi.

²¹ Wo Itayi faange ntul re, <<Etingitingi, ana Jehova li go elkpín, fúfo ana nsoo ntul ewame li elkpín, edi ajehng ajehng ji nsoo ntul ewame bahke jolo, afi jolo elkpín afi jolo elkv, o wo me nlokeltum ewa bahke jolo.

²² Devid tongo Itayi re, <<Song tahm, jen song.>> Owo Itayi nnea Giti soro jo jen a ane ebe kpee, go abangenahb enye, nyi jolo a ne.

²³ Anebe ejahbe jo lingi wahre wahre eji ane kpee kp'sehnge. Ntul fúfo tob siiri edamme ji Kidron, fúfo ane kpee jo jene asongo go elka emahng.

²⁴ Jadok tob jolo o, a anebe Levayi ba jolo a ne, bo solo elkohl atahm nwongo nyi Esowo. Bo bumu elkohl atahm Esowo ndi, Abiatar soro asi jo lim ajomjom tete ane kpee lohng go ejahbe.

²⁵ Ntul kehm tongo Jadok re, <<Rod elkohl atahm Esowo wo feere a ni song bum go ejahbe. N l'fere fili Esowo ndon, á bahke feere aname, fere lim re me n kpe nyehn elkohl nia a edi ellene eje.

²⁶ Wo á l'tong re, <<N kpimm eyebatahng a na, me n toobo ebjng, nong á lim-m ji á nyehne re ji ji nobo ege elbohngo.

²⁷ Ntul tob tongo Jadok ji nlimajom re, <<Wo nnyehnamahr wo, ano sanga? Feere song go ejahbe go elkoono. Rod mmon ewa Ahimaaji á song a na, tob rod Abiatar mmona Jonatan. Wo a Abiatar feeren a abon abal ebahne.

²⁸ M bahke siki go ebgba edi ji bo kpo siiri go ewum wum ndi erikendi, tete etib lohng ega ba

kpir-m.

²⁹ Owo Jadok a Abiatar kehm rodo elkohl atahm Esowo feere a ni go Jeusalem song jol go.

³⁰ Wo Devid soro asi ano asongo go ewong ji Oliv, jo ling ana á jo jen asongo, á bulu esi eje fere jo jen akpade nnehme nehme. Ane kpee ba jo jen a ne tob bulu asi ebo fvfo, bo jo lingi ana bo jo jen asongo.

³¹ Devid bo tong-e re, <<Ahitofel tob wob ntoobo ellame kak nio a Absalom.>> Wo Devid kake ero re, <<Jehova yaange elle ni Ahitofel, fere jol egboolo elle.>>

³² Eji Devid rehng go ero ewong edi ji bo kpo song kak Esowo, Husayi nnea Arkiti jolo o re á wan-e, ekpawobo eje ebyare fvfo ebtohko woom-e go esi.

³³ Devid tong-e re, <<A l'toon-m, a bahke jolo egburu elsol ka-m.

³⁴ Wo a l'fere feere go ejahbe song tong Absalom re, <Nsoo go ega ellub, m bahke jolo nlokeltum ewa, ' n jolo nlokeltum no nso nyanjehle, wo anv m bahke jolo nlokeltum ewa, a bahk-m ma kak ebo, tib a bahke jo wahng elle ni Ahitofel jo bvyrv.

³⁵ Jadok ji nlimajom, a Abiatar bo bahke jolo a na. Jo tong bo ejum ajehng ajehng ji a l'wuk go ekpasiki.

³⁶ Abon abal ebo, Ahimaaji mmona Jadok, abola Jonatan mmona Abiatar, bo li o a bo, tum bo tv-m a ejum ajehng ajehng ji a l'wuk.>>

³⁷ Owo Husayi, ye ji jolo ekpondahme ji Devid song rehng go Jeusalem ana Absalom jo yel na yel ejahbe.

16

Devid abola Jiba

¹ Eji Devid ma jen mmokidi ntiil sehng ero ewong asongo, Jiba nlokeltum no Mefiboseti yiimi o, á jo siki re á wan-e. Á bele el-long ebvankang bi á toobo bo, fere gbade bo ebred atahlawubu, atasok agreb nya ma wum atahlalon, akab afik atahlalon, a eyahbe amahm.

² Ntul kehm bahbe Jiba re, <<Jenji wahnge a koo nyaa ba a nya?>> Jiba kehm faange re, <<Ebvankang li ka nlaaga ntul kpee re bo jo kuumu, abred a akab nti li ka ane ba ntul re bo jo li, amahm li ka ane ba ma lahng re, bo jo wo nyamme elbo go elka emahng.>>

³ Ntul kehm bahbe re, <<Gan wo mmona mmon no nso ewa li no?>> Jiba tong-e re, <<Á li go Jeusalem, tib á tiri re, <<Lela anebe Isreel bahke feere etul bi nde a nde ka-e.> >>

⁴ Owo ntul kehm tongo Jiba re, <<Nsol kpee nyi li ka Mefiboseti, anv fere li nya nya.>> Jiba kehm bungu re, <<Me n rede elname gong ndi, nong me n lub fil-a ndon ega elbohngo nsoo ntul ewame.>>

Simeyi Suu Devid

⁵ Ana ntula Devid jo kabbe ejahbe ji bo kpo lung re Bahurim, nne no lohngo ejahbe j'nehm, á jolo nnea nnahba Sol, kehm lohngo o ba. Mbing enye bo jo lung-e re Simeyi mmona Gera, á jo su Devid ana á kp'lohngo abake.

⁶ Á jo ro atal tv Devid, a atubesi abalimeltum ebe kpee, jol eji jolo jol re ellong ane kpee, a

akahme kahme ane ba jo baabe Devid, jolo Devid ejang eboblum a ejang ebobkal.

⁷ Simeyi jo su-e jo bung re, <<Lohng song, lohng song, wo nwulane noa, wo nne eblum noa.

⁸ Jehova ma-a bongo go ane kpee ba a wulu no go nlaaga nyi Sol, ye ji a jehk go ege nji kp'fili. Jehova ebrod etul kak abo nya mmon ewa Absalom. Wob jol erem erem tib a li nwulane.

⁹ Owo Abisayi ji nnyehn jolo Jeruya kehm tongo ntul re, <<N'nan wahnge ekpaku mbv nyia bahke suku nsoo ntul ewame anae? Nong me n song kim-e esi.>>

¹⁰ Wo ntul bungu re, <<Jia ka me a wahn afan anya, wahn abon ba Jeruya? L'jol re á kp'suku tib Jehova me-e tong re su Devid, nne awoo bahke ma bahb re, <Jenji wahnge á kp'limi jia?> >>

¹¹ Owo Devid kehm tongo Abisayi a atubesi abalimeltum ebe kpee re, <<Mmon ewame, ye ji li alung ma mame, kp'gare re á wul-m, kehm jolo renan a nne et'tohngo Benjamin noa; yaken ye go, nong á su, Jehova wo me-e tong re á lim ano.

¹² Li ma jol re Jehova bahke nyehne akanya enyame, fere feere ka-m elfuulu ene, sehng re akuk enye toon-m lela.>>

¹³ Owo Devid a ane ebe soro asi mbang eljen a bo, gana Simeyi jo sehng nkpe ewong songo songo wane Devid, jo su-e mbang mbang ana á fi no, fere jo ro atal tv-e fere jo kpu ebtohko saade tv-e.

¹⁴ Ntul a ane ebe kpee song rehng edi ajehng, bo lahng sehng, bo re ekv o, fere li nsol.

Elle ni Ahitofel abola Husayi

¹⁵ Ngare nyia Absalom a anebe Isreel kpee ebba go Jeusalem, fvfo Ahitofel jolo a ne.

¹⁶ Owo Husayi, nnea Arkiti, ye ji Devid jo bum-e go etingitingi, kehm jeke goji Absalom song tong-e re, <<Ntul a bahke kpini! Ntul a bahke kpini.>>

¹⁷ Absalom kehm tongo Husayi re, <<Ano wo li elkoro ni a tibi nte ewaa? L'jol re nte ewa wo, n'nan a ki-e toono?>>

¹⁸ Husayi kehm tongo Absalom re, <<E'ee, nne awohng awohng no Jehova ma yehke, a ane ma taame, a anebe Isreel kpee ma taame, ye wo m bahke jolo a ne, fvfo ye wo m bahke sake a ne.

¹⁹ Wo fvfo anv, nne awoo m bahk-e loko? Mmon sang m bahk-e lok-a? Jang jang ana n loko nso, ano wo m bahke tob lok-a.

²⁰ Absalom kehm tongo Ahitofel re, <<Tub-r elle n'na, jenji fuumu re wahr lim?>>

²¹ Ahitofel kehm faange re, <<Song noongo a nkoro nyi nso tahme sa re bo jo kpur ekpasiki. Owo anebe Isreel kpee bahke wuku re wob daange nso, fvfo abo nya nne awohng awohng ma-a kunu bahke sahb t'tahne.>>

²² Owo bo kehm sehke mobkpatahk go ero elbultahk, Absalom song yel noongo a nkoro nyi nde go esamahr anebe Isreel kpee.

²³ Go afung nyao elle ni Ahitofel jo tub, jo jolo are nne no jo bahb goji Esowo wo. Ano wo, bo ane abal abal, Devid a Absalom, jo ko elle ni Ahitofel.

17

¹ Wo Ahitofel kehm tongo Absalom re, <<Ka-m nsahm me n yehke ane atahltahl eltahl a nkpel ewubu, bo lohng atv maa, song kam toono Devid.

² M bahke noko a ne, eji eko me-e tan, á ma lahng. M bahk-e limi, á bel egburu elfahle, fvfo ane kpee ba li a ne bahke beke sa. M bahke wulu ntul wo wo,

³ fere ko ane kpee, feere a bo ba ka-a. Nne no a kpe-e sebe l'si kp'kpo eblohngo re, ane kpee bahke feere go ega, ane kpee ejumjum nehm lim bo.

⁴ Ntoobo nyia n'nob go esamahr bi Absalom, a anebkul Isreel kpee.

⁵ Wo Absalom bungu re, "Tob lung Husayi nnea Arkiti eji á l'tob wuk ana ye fvfo bahke tob bung.

⁶ Eji Husayi ba ege, Absalom tong-e re <<Ahitofel wo ma tub elle nia. Wahr lim ana á bungu noa? Tohko jol ano tob tong-r ntir enya.>>

⁷ Husayi kehm faange Absalom re, <<Elle ni Ahitofel ma tub nobem anv.

⁸ A kp'kahne re nso a ane ebe, bo abanok nta ba, sahb t'tahne are ebea ji bo ma taare abon ebe ji. A l'bum jia go nkpe, nso nne no kpi awak ebta anoko wo, á nehm kang edi ajehng a ane ebe.

⁹ Jol anv, yebbiiri agong atal, tohko jol ano edi jindiki. Á l'fere gbo mbang bohko ane eba, nne awohng awohng l'wuk, á bahke bungu re, ewul ebjol go ellong ane ba kp'toono Absalom.

¹⁰ Jol abanoko nta ba kpi esahb, bo ji ntim ebo li ana egabe, bo bahke kehme elkahme fere jo fahl, tibre anebe Isreel kpee kp'kahne re nso nnoko ebta wo, fvfo bo ji li a ne ane ba kpi esahb ba.

¹¹ Owo n kp-a tubu elle re: Nong anebe Isreel kpee, bomo Dan rehng go Beeseba, ana bo ruru are erikendi bi nkpe aya bi, bo ba kono ega, budu

a wofono, wo gbo bo mbang ehta.

¹² Owo wahr bahke noko a ne edi ajehng ajehng ji e l'nyehn-e, e bahke gboko bul-e ana ebohng kpo na wohngo ndi. Jolo ye afi ane ebe, nnene nehm sa jol elkpín.

¹³ Á l'fere be yel ejahbe, eblohng re wahr anebe Isreel bahke koko nlehke ba kahn ejahbe jio tohng tub edamme, tete jol nkpaketaale nehm sa.>>

¹⁴ Absalom a anebe Isreel kpee kehm bungu re, <<Elle ni Husayi ni ma ga nob sehng ni Ahitofel. Tibre Jehova wo ma toobo re á bvrvv etingi elle ni Ahitofel eji á l'ko elranng ba ka Absalom.

¹⁵ Husayi tongo Jadok a Abiatar bo ji jolo abalimajom re <<Ahitofel ebtub Absalom elle a anebkul Isreel re bo lim ana, bo lim ana, wo me n tub bo elle re bo lim ana ana.

¹⁶ Anv tum etib tvtv tv Devid wo tong-e re, <<Atv maa ka kang ewum wum ndi erikendi, siiri aya Judan song, ka laange tohko jol ano, ntul a ane ebe kpee ba li a ne, bo bahke mele bo.> >>

¹⁷ Jonatan a Ahimaaji bo jolo go En-Rogel. Nlokeltum no nkal wo jolo re á song tong bo, bo ba jol jeke song tong ntula Devid, Wo bo jolo efin efin, tib bo jol nyehne bo eji bo kp'yele ejahbe.

¹⁸ Wo njangkun anyehng nyehne bo fere song tong Absalom. Owo bo ane abal abal soro tahm tvtv go etahk nne awohng go Bahurim. Á bele elbing alahb egea nlaaga, bo song badde yel atahng.

¹⁹ Nkal ewe kehm rodo mbulu song nyange bulu go nnyo elbing alahb, fere yale nkohl o kpee, nnene kahnem ejumjum bade.

²⁰ Eji ane ba Absalom ba goji nnenkal noo etahk jio, bo kehm bahbe re, <<Ahimaaji abola Jonatan bo ba na?>> Nnenkal noo faange bo re, <<Bob siiri ebgba fi.>> Ane bao sebe bo, bo nyehnem nnene, bo feere ebo kehng go Jeusalem.

²¹ Eji bo ma tahm, ane abal bao fere wahr elbing alahb lohng re bo song tong ntula Devid. Bo tong-e re, <<Mehl tahm wo siiri aya tvtv; Ahitofel ebtub Absalom elle ana ana bade a na.>>

²² Owo Devid a ane ebe kpee kehm mehle tahm siiri aya Jodan. Re efungfu se nnene jolem no ki siiri aya Jodan.

²³ Eji Ahitofel sebe kahn re elle ene bo toonem, á kehm toobo mbvankang enye tahm asongo ege etahk ege ejahbe. Á song toobo nlatahk enye, fere song kahn elne ekehd. Á kpo, bo kake elahm nde ewe.

Elkv ni Absalom

²⁴ Devid tahme go Mahanayim, fvfo Absalom siiri aya Jodan, a anebe Isreel kpee.

²⁵ Absalom yehke Amasa re á jo fili nsoja go enyo ji Joab. Amasa jolo mmona Jeter nnea Isimayel, ye ji ma tohko ko Abigail mmon no nkal no nsoo Nahasi, á jolo mmonannyehn no nkal no Jeruya nnyehn no Joab.

²⁶ Anebe Isreel a Absalom, bo si nkpatahk go ndi nyi Giled lene o.

²⁷ Eji Devid ba go Mahanayim, Sobi mmona Nahasi ye ji lohng go Raba ji anebe Amon, a Makir mmona Amiyel ji lohng go Lo-Deba, a Bajilayi nnea Giled go Rogelim,

²⁸ bo ko nsol edilnong, agbojok, akpeeke, awid, abali, aflawa, a awoko woko akohl, a alahngelahnge, alahngelahnge nya bo kpo lung re lentil,

²⁹ akehng ekon (Butter) ejoro, alahb bel efong ba ka Devid a ane ebe re bo li, tib bo bungu re, <<Ane bao eko ebtan bo, njal a ekor lahb go elka emahng.>>

18

¹ Devid ku ane ebe ba jolo a ne bum ag'gabe ag'gabe, fere yehke atubesi kunu ag'gabe nyao, bo jehko jo kpur atahltahl nkpel ebal atahlawubu, atahltahl nkpel ebal atahlawubu, bo jehko jo kpur atahlalon alon.

² Devid kehm tumu nsoja enye go nllong era, ellong nehko jolo elwo ni Joab, nehko jolo elwo ni Abisayi mmonannyehn Joab mmon no Jeruya, ellong nehko elwo ni Itayi nnea Giti. Ntul tongo nlong ane bao re, <<Mefono antahng m bahke tiki jo jen toon-n.>>

³ Wo ane bao bungu re, <<Wo a nehm tiki lohng je ed'di; bo l'kam-r re wahr be, bo nehm tiiri bade elnahre. Jol afi ejang ajehng ji ane baa kpo na, bo wahr nehm tiiri, wo wo kp'lubu sehng-r, afi jolo atahltahl nkpel eltahl a nkpel eni kunu atahltahl. Bahke ga nob re, wo sa a ejahbe, jo tum ekakebo tv-r, e l'fere seb.

⁴ Ntul kehm faange re, <<M bahke limi ji fuumu egahne esamahr.>> Owo ntul kehm yiimi nkpe eti mbu, ane kpee sehng lohng go nlong a nlong, nyi atahl alon alon, a nyi atahltahl nkpel ebal atahlawubu, atahltahl nkpel ebal atahlawubu.

⁵ Ntul kaa Joab, Abisayi a Itayi elkahn re, <<kunen ekpu bade njangkun nyio Absalom tib egame esi,>> Nlong ane kpee w'wuk ana ntul ka elkahn bade Absalom tong atubesi ba nlong ane bao.

⁶ Nsoja nyi Devid jene lohng ejahbe re bo song nok a anebe Isreel, ebta bio jolo go ekulugbe ji Efriim.

⁷ Nsoja nyi Devid wulu nlong nsoja nyi Isreel, ane ba bo wulu no efung gbale sehng, bo jolo ane atahltahl nkpel atahlabal a nkpel enehkeni atahltahl nkpel ebal.

⁸ Ebta nyange rehng nkpe ejahbe jio kpee, fvfo ekulegbe ji ga tane ane efung bio sehng ba bo wulu bo go ekahngkahng.

⁹ jolo ano re Absalom kehm song kpiri ane ba Devid. Á jo fingi mbvankang, eji mbvankang jo be asongo, song ludu nla egburu eti Oak ji sahb ny'nyange ab'bo, Alv esi nya Absalom song kpehre eti. Á sa tokko o wung wung wuung, ga mbvankang kp'beke asongo ntahng ntahng

¹⁰ Eji nne awohng ma nyehne ji ma lim, á kehm tongo Joab re, <<Me n nyehn Absalom go tohk no go eti ji bo kpo lung re Oak.

¹¹ Joab tongo nne no tong-e ejum jia re, <<Á re jen! á re a nyehne Absaloma?>> Jenji wahng a ki-e kim tub ndi wul-e o tvtv? N jol-a kake ebahk asilva ebwubu a egbaange ji ntakuru.

¹² Wo nne noo faang-e re, <<Jolafi bo gaare asilva atahltahl nkpel ebal atahlawubu kak-m ebo. N nehm tiki lak mmona ntul ebo. Egahre elwuku, ntul kaa elkahn tong-a a Abisayi go Itayi

re, <Tahren njangkun nyio tib esi ejame.>

¹³ Li re m bumu elkpin daange daange daange ejum lim ji li mbehr mbehr go esamahr ntul, kehn wofono antahng a ma-m yab tv go fee.>>

¹⁴ Joab kehm bungu re, <<Me n nehm ranng ngare laange sik-a ana.>> Owo á kehm rodo nkong era fili ege ebo, song jamme Absalom go eltim ngare nyi á kpeka li mbir mbir eji á tokko eti ji bo kpo lung re oak.

¹⁵ Ane awubu ba jo fili nsol ebta nyi Joab yiimi o senng Absalom kak, bo ba kim-e tub fere wul-e.

¹⁶ Owo Joab kehm woro ntang, nsoja rahke elkame anebe Isreel, tib á s'sahde bo.

¹⁷ Bo rodo ekv ji Absalom ro kak egburu ekpabingi fere kpu ebim atal bul-e. Gana anebe Isreel kpee ebbe kehng ebo a ntahk.

¹⁸ Ngare nyi Absalom kpeka li elkpin, á lo ego go edamme ji ntul ana ejum elbuumu ka elne, á tiri re, <<Mmon no nlum n kpimm no bahke buumu mbing enyame.>> Á gungu ego jio mbing ka elne antahng, bo kpo lung re, ejum elbuumu ji Absolom tete tub lela.

Devid noongo elkv Absalom

¹⁹ Ahimaaji mmon no Jadok kehm bungu re, <<Nong me m be, ko etib bia song tong ntul re Jehova ebbongo ka-e eji á me-e yehke go abo nya anebekv ebe.>>

²⁰ Joab tong-e re, <<Wo sang bahke koko etib bia lela, á li ma ko etib song tiingi efung bindiki, wo á nehm ma lim ano lela, tib esi mmona ntul no ma kpo.>>

²¹ Owo Joab kehm tongo nnea Kusiti re, <<Song wo song tong ntul ji a ma nyehn.>> Nnea Kusiti kehm soro gong ndi go esamahr bi Joab, fere be tahm.

²² Ahimaaji mmona Jadok kehm kpe bung tong Joab re, <<Afi jolo jen, nong me n jo be toono nnea Kusiti go njahm. Wo Joab faange re, Mmon ewame, jenji wahnge a kp'sebe re wo jee? A kpimm etib abehng abehng bi bahk-a kake eltu-uru.>>

²³ Á bungu re, <<Afi jolo jen, n kp'sebe re me n be je, Joab bungu re, aa, <<Be song me!>> Owo Ahimaaji kehm beke sehng mbang nyi edi ebal ebal, fvfo a bee sehng nnea Kusiti.

²⁴ Eji Devid jii elka elka eti mbu atahng a ji alatahk, nne no jo baabe wahre kuumu ero elbultahk ni mbuga go ekahme. Ana á jo kpur, á nyehne nne kp'beke ntahng ntahng.

²⁵ Mb'baabe kehm lungu ntul fere tooro tong-e. Ntul bungu re, <<L'jol re á li antahng, bahke tiki jol re á koo nnoobo etib kp'bake.>> Mbekabahl jo kabbe abake abake.

²⁶ Owo mb'baabe noo kehm kpe nyehn nne noko kp'kpeka be abake, á kehm lungu nne no jo baabe eti mbu re, <<Nyehno, nne noko kp'beke ntahng ntahng abakaoo!>> Ntul bungu re <<Á kp'tiki tob ko nnoobo etib abake.>>

²⁷ Mb'baabe bungu re, <<Kp-m jolo ga are ngbokambang a nne kp'beke ana Ahimaaji ji mmona Jadok.>> Ntul bungu re, <<Ye nnooba nne wo, á kp'bake a anoobo ntib.>>

²⁸ Ahimaaji kehm lungu ntul re, <<Kpee kp'nobo, á kehm gongo ka ntul a esamahr ebe go

ndi, kehm bungu re, "Eltehke jol ka Jehova Esowo eba. Yebjabbe ane ba tabe abo ebo re bo nok a nsoo ntul ewame.

²⁹ Ntul kehm bahbe re, <<Absalom njangkun nyio f'fora? Ahimaaji faange re, <<N nyehne egburu ejooko eji jolo re Joab yahke tum nlokeltum a ntul a me ji li nlokeltum ewa, wo n kahnem ji jolo no.

³⁰ Ntul bungu re, <<Yiimi nkpe o sik.>> á tahm song yiimi nkpe go.

³¹ Owo nnea Kusiti kehm ba lohng ba bung re nsoo ntul, wuk nnoobo etib, Jehova ebbongo ka-a eji á ma-a yehke go abo ane kpee ba mehle no bada na.

³² Ntul kehm bahbe nnea Kusiti re, <<Anv, Absalom njangkun nyio f'fora?>> Nnea Kusiti faange re, <<Nong anebekv ba nsoo ntul a bo kpee ba ma mehl yiimi re bo lim-a ejum jol ana njangkun nyio.>>

³³ Ntul ngubjing gbehk-e gbehke. Á tahm yel ekp'kpa ji jolo go ero ekahme mbuga song kehme ellingi. Eji á tahme no, á bungu re, <<Eyee mmon ewame Absalom! mmon ewame, mmon ewame! Absalom! Me wo jol lub kpo, sehngere wo kpo. Eyee Absalom mmon ewame mmon ewame!>>

19

¹ Bo tongo Joab re, <<Ntul kp'lingi, fvfo á nong elkv ni Absalom.>>

² Fvfo nsoja kpee, esehngere ebta efung bio, fere kpiidi, jol elkv anoongo, tibere efung bio nlong ane w'wuk eji bo bungu no re, <<Ntul kp'lingi mmon ewe.>>

³ Ane jo weele na yel ejahbe efung bio, ana ane ba kp'weele yel ba ma bel esono eji bo be go ebta.

⁴ Ntul bulu esamahr ebe fere jo ling wahre wahre re, <<Eeye mmon ewame Absalom, Eeye Absalom mmon ewame, mmon ewame, mmon ewame!>>

⁵ Owo Joab kehm tahme etahk goji ntul kehm bungu re, <<Lela wob sono ane eba kpee, bo ji ma tahre elkpín ena, a nkpín nyi abon eba ba nlum, a ba nkal, a nkpín nyi akal eba, a nkoro enya.

⁶ Ane ba a kpi bo tehn, bo ba kpo kor-a, fvfo ba wo kpi bo kor, bo ba kpo tehn-a. Wob tib gbuul lela re atubesi a ane ebo ejumjum bo lohngem ka wo. Me n nyehn re, jol-a koro re Absalom jol elkpín lela, fvfo wahr ga wahr kpo kpee.

⁷ Anv, lohng song wo song kak ane eba eltim. Me n tir go mbing nyi Jehova re, á tohko lim ano, jol nne na awohng, wa-a nehm kpe sa, atv kehm behde. Jia bahke sabe na sehngé asab asab nsol kpee nya ma-a lim bomó eji ajólo njangkun tete rehng anv.>>

⁸ Owo ntul kehm mehle song ji go ege eti go mbuga. Eji bo tongo ane re, <<Ntul noa jehk go mbuga,>> bo kpee kehm bake go ege esamahr.

Gana, anebe Isreel ebbe kehngé go ebo a ntahk.

Devid feere kehngé go Jeusalem

⁹ Gona at'tohngo nya anebe Isreel, ane kpee jo limi nfaabe bo bo re, <<Ntul wo yehk-r go abo nya anebekv ebahre, ye j'nehm wo ma-r foro yake go abo nya anebe Filista. Wo anv yeb be ejahbe re á for go abo nya Absalom;

¹⁰ anv Absalom ji e wohng-e akehng bob-e etul re á fil-r ebkpo go ebtaa. Jenji wahnge n kil bungu ejumjum bade ana e bahke koko ntul feere a ne? >>

¹¹ Ntul a Devid tumu etib bia tv Jadok a Abiata, bo ji jolo alimajom re, <<Bahben anebkul ba Juda re, <Jenji wahnge wahn bahke jolo akahlenjahm ane go elkoko ntul feere a ne ege ekpasiki, eji elbungu ni bo kp'bungu go Isreel kpee ma rehng ntul go atung go ege etahk?

¹² Wahn ba li akunu enyame, ngubjing ny'nyame a alung alung. Jenji wahnge, wahn bahke jolo akahlenjahm ane go elkoko ntul feere a ne?>

¹³ Fvfo tong Amasa re, <Wo fvfo á tobem li ngubjing enyame a alunga? Nong Esowo bib aname, sahb b'bib aname, l'jol re n wa nehm lim re wo jol ntubesi a nsoja enyame go ngare nyi a li elkin go enyo Joab.> >>

¹⁴ Go mbang nyia David koo aneblum ba Juda elfono ni ntim re, bo kpee fere jol a ntir ntir anyehng. Bo tumu ellum tv ntul re, <<Feere, wo a ane eba kpee.>>

¹⁵ Owo ntul kehm feere, á jene ba rehng aya Jodan. Aneblum ba Juda kehm bake Gilgal, bo tahm song kpiri ntul ko-e siiri Jodan.

¹⁶ Simeyi ji mmona Gera, ye ji lohng et'tohngo ji Benjamin go ejahbe ji bo kpo lung re Bahurim, foomo asongo a aneblum ba Juda re bo song wane ntula Devid.

¹⁷ Ane ba toon-e no bo lohng go et'tohngo ji Benjamin bo jolo ane atahltahl nkpel ebal, ane atahlawubu, a Jiba nlokeltum no nlaaga nyi Sol,

bo kpee jolo o, abon ebe ba n lum ane elku, budu alokeltum ane eltahl. Bo foomo rehng go Jodan edi ji ntul jolo no.

¹⁸ Bo siiri go edi elsiiri re, bo song ko ntul a ane ebe kpee, fere lim ajehng ajehng ji á l'tong bo.

Eji Simeyi mmona Gera siiri aya Jodan, á song gbo ndi tanne elne ka ntul,

¹⁹ kehm bungu tong-e re, <<Nong nsoo ewame kiim ka ebi. Ka buumu ana nlokeltum ewa limi ebi, efung bi nsoo ntul ewame lohngo Jeusalem sa. Nong ntul yehke jio ege a ntir.

²⁰ Tib me nlokeltum ewa kp'kahne re, me n lim abiafem. Wo lela me m ba a ana ngbokambang a nne go et'tohngo ji Josef re me m ba, ba wane nsoo ntul ewame.>>

²¹ Owo Abisayi mmona Jeruya kehm bungu re, <<Anv fuumem re bo wul Simeyi go ejum jiaa? Á suu nne no Jehova wohng-e akehng bob-e etul.>>

²² Devid kehm faange re, <<Jia bahke jen lim ka-n wahn abon ba Jeruya? Ebo abii a kpi no go nfem nyia? F'fuumu re, bo wul nne go Isreel lelaa? Anv me nehme kahn lela re, me li ntul ka Isreela?>>

²³ Owo ntul kehm tongo Simeyi re, <<A nehm kpo.>> Ntul nyame ko nwongo.

²⁴ Mefiboseti ji mmona mmona no Sol, ye fvfo tob je re á song wane ntul. Jol akpade enye, á kpeem jo kunu ekpu, afi kpud elahng, afi ru nsol ebjing, bomo efung bi ntul tahme no tete rehng efung bi á feere no go elkoono.

²⁵ Eji á lohngo go Jeusalem ba wane ntul, ntul bahb-e re, <<Jenji wahnge a kii tahm toon-m, Mefiboseti?>>

²⁶ Á bungu re, <<Nsoo ntul ewame, eji li re me nlokeltum ewa, n li mbanne, <M bungu re, <M bahke toobo mbvankang enyame kuumu, eji n l'toono ntul tahm.> Wo Jiba nlokeltum ewame ye wo rod-m gungu.

²⁷ Fvfo ye wo ranng e nlokeltum ewa ka nsoo ntul ewame. Nsoo ntul ewame li ana enjel nyi Esowo. Lim ji fuum-a no.

²⁸ Et'tohngo ji babnsoo ji jele bab nsoo kpee, ejumjum fuumem a bo sehng e elkv ni bahke lohngo goji nsoo ntul ewame, wo a kaa nlokeltum ewa eyake go ellong ane ba kpo li nsol ega ekp'kuru. Anv, jenji n kpi no ji m bahk kpe bahb ntul?

²⁹ Ntul tong-e re, <<Jenji wahng e a kp'kpeka bung budu? N kp'bungu re wo, a Jiba, wahn baang e ndi nyio nyi akang.>>

³⁰ Mefiboseti tongo ntul re, <<Nong ye rod ejum ajehng ajehng, anv, eji nsoo ntul ewame ma feere kehng e nob nob.>>

³¹ Bajilayi nnea Giled kehm tob lohng go Rogelim ba, á ba siiri Jodan a ntul fere tv-e go mbang.

³² Wo Bajilayi jolo nne no sahb k'kul, ngare nyia yebkang nnya atahlani. ye wo toobo nsol ka ntul ngare nyi ntul jolo go Mahanayim, tib á jolo efangene.

³³ Ntul tongo Bajilayi re, <<Siiri aya toon-m wo ba jol aname go Jeusalem, m bahke jo kpur-a kpur.>>

³⁴ Wo Bajilayi faang e ntul re, "Nnya ebik nyi me bahke kpe kang, nyi m bahke tahme je go Jeusalem song jol a ntul?

³⁵ Me n kang nnya atahlani. Anv m bahke

ma tib elyaange ejum ji kp'yebe a ji kil yeba? Anv nlokeltum ewa bahke ma kpe wuungu ji a kp'lehke a ji a elwoka? Anv, m bahke ma kpe wuk alum nya abayimase ba nlum a ba nkala? Jenji wahnge nlokeltum ewa bahke kpe budu nsoo ntul ewame elsol?

³⁶ Me nlokeltum ewa bahke siiri aya Jodan a ntul, jen mmokv ntiil, wo jenji wahnge ntul bahk-m tuuru go mbang ana nyia?

³⁷ Nong me nlokeltum ewa feere song, eji n l'kpo egame ejahbe kohlo elahm bi nsoo ewame a nnee. Wo nyehn nlokeltum ewa ga Kimham. Nong a siiri a nsoo ntul ewame. Lim ka-e ana kor-a no.>>

³⁸ Ntul kehm bungu re, <<Kimham bahke siiri toon-m, fvfo m bahke limi ka-e ana kor-a no. Wo fvfo, ajehng ajehng ji a sebe no go egame, m bahke limi ka-a.>>

³⁹ Ano wo ane kpee siiri Jodan, ntul kehm tob siiri. Ntul kehm bingi Bajilayi fere tong-e re, á song nob nob, fvfo Bajilayi feere kehng ege etahk.

⁴⁰ Eji ntul siiri aya Jodan song rehng go Gilgal, Kimham s'siiri toon-e. Ellong nsoja Juda kpee, a ejang ellong nsoja Isreel bo ba rodo ntul siiri a ne.

⁴¹ Mongare ntiil, anebe Isreel kpee kehme elake eji ntul ba kehm-e eltongo re, <<Jenji wahnge abonanee ebahre, aneblum ba Juda, ba v ntul tahm a ne, fere ko-e a anebe etahk ebe kpee siiri Jodan, a ane ane ebe kpee?>>

⁴² Ane ba Juda kpee faange anebe Isreel re, <<E limi jia tibre ntul li kohl-r. Jenji wahnge atahng kp-n rake bade ejum jio? Anv, wahr ebli nsol

ntula? Anv wahr ebrod ejum ajehng ajehng ka elnahra?>>

⁴³ Owo aneblum ba Isreel kehm faange aneblum ba Juda re, <<Go mbake, wahr kpi nkpel na ebwubu, goji ntul*, wahr ba ga kpi eko goji Devid sehng wahn. Jenji wahngé n kp-r fili go mbang edaangenne? Wahr sang gbo mbang bung bade elkoko ntul ewahre feere a nea?>>

Wo ane ba Juda jo kpe sab jo b'bung na eko eko re bo ba, sehng anebe Isreel.

20

Seba sebe Devid ntong

¹ Ngare nyia, nsebantong a nne no bo jo lung-e re Seba mmona Bikehri, á lohng go et'tohngo ji Benjamin, á jolo o, á woro ntang fere rabe re, <<Wahr kpimm ebo abehng abehng goji Devid, jol ejumjum e kpimm goji mmona Jese. Nnea Isreel awohng awohng feere song kehng go ege etahk.>>

² Wo anebe Isreel kpee ten Devid fere jo toono Seba ji mmona Bikehri. Wo ane ba Juda jolo bad a ntula bo, bomo go Jodan tete rehng Jeusalem.

³ Eji Devid kehng no ba rehng ege ekpasiki ga Jeusalem, á rodo nkoro enye na ewubu, bo ji á bumu bo re bo jo kpur ekpasiki, fere song kak bo etahk ji bo kake mbaabe. Ye wo jo ka bo nsol alehke, wo á tikem kpe bel elnong a bo. Bo baame

* **19:43 19:43** *ntul* bo jolo et'tohngo ebwubu go Isreel, go Juda et'tohngo ajehng

bo, bo jol edi ajehng, tete afung elkv ebo, bo jolo o ana akalebun.

⁴ Owo ntul kehm tongo Amasa re, <<Tong anebe ba Juda, bo ba egame ejum nfung era, wofono tob jol a.>>

⁵ Wo eji Amasa jee no re á song tong aneblum ba Juda, á laange sehng afung nya ntul kak-e no.

⁶ Devid tongo Abisayi re, <<Seba mmon no Bikehri bahk-r limi ji ga sab sehng ji Absalom limi no. Rod ane ba nso ewa, wo song kam-e, tohko jol ano, á bahke sebe ejahbe ji bo ma kak ega be song yel, for egahre ebo.>>

⁷ Owo anelum ba Joab, anebe Kereti a Peleti, go agburu atahntahn atakuru kpee mehle lohng go eko ji Abisayi. Bo mehle lohng Jeusalem re bo song kam toono Seba ji mmona Bikehri.

⁸ Eji bo kpeka li go egburu ekpartal ji Gibeon, Amasa kehm ba wane bo. Joab kake nsol ebta enye, gbaange elne egbaange go ebun, fere gbade ekere bi woomo mbak. Eji á jo jen asongo ekere kehm wobo go mbak gbo.

⁹ Joab kehm tongo Amasa re, <<Mmonannee li renan?>> Joab kehm koko eboblum ebe jabbe elahng bi Amasa re á bing-e.

¹⁰ Amasa joom kunu ekpu bade ekere bi wob ebo bi Joab. Joab kehm-e jahme ege ala, ala enye lohng gbo ndi. Jol á we-e kpeem jahm budu, Amasa kpo. Owo Joab abola mmonannyehn Abisayi bo kehm soro jo kam Seba ji mmona Bikehri.

¹¹ Nne nsoja Joab awohng no yiimi ka Amasa kehm bungu re, <<Nne no li ka Joab, a nne no li ka Devid, nong á toono Joab!>>

¹² Amasa sa noongo mbang ege alung o elka mbang, fvfo nne no nyehne re nsoja kpee jo ba sa yiimi o. Owo eji á sebe kahn ano re, nne awohng awohng no jo ba eji Amasa jo sa yiimi o, á kehm-e tohngo go mbang song bum ekul fere bul-e mbomo.

¹³ Eji bo ma rod Amasa go mbang, nne awohng awohng jo ba sehng toono Joab, bo jo kam Seba ji mmona Bikehri.

¹⁴ Seba sehng go at'tohngo nya anebe Isreel kpee rehng go Abel Beti Maaka, sehng o rehng arohko nya anebe Bikehri, bo mehle kono edo ajehng tahm toon-e.

¹⁵ Nlong ane kpee ba jo toono Joab, song senng Seba go Abel Beti Maaka. Bo kpu nsol luk fohko atal yahke go ekahme jio eji nsoja l'wahr wa ekahme,

¹⁶ ebangbang nnenkal no jolo ejahbe jio kehm rabe re, <<Wuungen atung! Wuungen atung! Tong Joab, á ba a, eji n l'bung a ne.>>

¹⁷ Joab soro je eji nnenkal noo, á kehm-e bahbe re, <<Wo wo li Joaba?>> Á faange re, <<Me wo.>> nnenkal noo bungu re, wuungu atung ejum ji me nlokeltum ewa yahke bung, Joab re n kp'wuungu atung.

¹⁸ Nnenkal noo soro asi go elbungu re, <<Mahne go bo jo bungu re, <Song bel nfaange enye go ejahbe ji bo kpo lung re Abel,> ano wo jo lohko jol.

¹⁹ Ejahbe ejahre li ejahbe elkoono a ejahbe ekakesehk go Isreel. Á kp'gare re wo ranng nnyehn ejahbe go Isreel. Jenji wahng a yahke mele ejum elehkelkv ji Jehova?>>

²⁰ Joab re, <<Ndan gbaa aname, ndan gbaa aname re me n ranng'e afi mele ejum elehkelkv ji Jehova.

²¹ Ano sang li ntoobo enyahre. Nne no bo kpo lung-e re Seba ji mmon bo Bikehri, á lohng ejahbe ewong ji Efrim, ye wo ma tab ebo ntong bada ntul, bada Devid. Yak-e kam, m bahke tahme lohng ejahbe jia sa.>>

Nnenkal noo kehm tongo Joab re, <<Bo bahke roko esi eje siiri go ekahme tv-a.>>

²² Owo nnenkal noo kehm jeke goji ane kpee a elle elkahne ene, bo kim Seba ji mmon no Bikehri esi ro tv Joab, Joab soro wor ntang, ane ebe soro tahm lohng ejahbe jio, no nne tahm kehng'e ege etahk. Joab feere goji ntul go Jeusalem.

Atubesi abalimeltum ba Devid

²³ Joab wo jo fili nsoja kpee nyi anebe Isreel, Benaya ji mmon no Jehoda jo fili nsoja nyi anebe Kereti a nsoja nyi anebe Peleti.

²⁴ Adoniram wo jo kpur ane ba jo tohng ane go nsahm bo jo lim ntum, Jehosafati ji mmon no Ahilud wo jo nyono nsol nyio nyi limi no kak go nwer.

²⁵ Seva wo jolo nnyonawer, Jadok abola Abiata bo jolo abalimajom,

²⁶ fvfo Ira nnea Jairo jolo nlimanjom no Devid.

21

Devid bongo go enyo ji anebe Gibeon

¹ Ngare nyi Devid jo fili ejahbe, njal j'jol nyi kange nnya era; Owo Devid sebe esamahr bi Jehova. Jehova tong-e re, <<Ejum jia li tib eyake

ji Sol, a etahk eje ji ma leele alung alung; tib eji á wulu anebe Gibeon.>>

² Ntul kehm lungu anebe Gibeon, fere bung a bo. (Anebe Gibeon woomem ellong anebe Isreel, bo jolo ka anebe Amor, anebe Isreel ko nwongo re, bo bahke kuuru bo, wo Sol go ege ekor ji á bele a Isreel go Juda, á gare re á wul bo kpe kpe.)

³ Devid kehm bahbe anebe Gibeon re, <<Jenji m bahke limi ka-n? Mbang anyii m bahke gongo ka-n, eji n l'fuulu nlehkelkv no Jehova?>>

⁴ Anebe Gibeon kehm-e faange re, <<Wahr kpimm eko re wahr tong bo ka-r asilva afi agul nya lohng eji Sol afi nya nnahb enye, jol wahr kpimm eko re wahr wul nne awohng awohng go Isreel. Devid tiki kpe bahb re, <<Jenji m bahke limi ka-n?>>

⁵ Bo faange ntul re, <<Wo, ana eyaame ji nne no ranng-r no, fere lam kak-r, ma wahng bo ma-r gbake bum go nkpe, edi ajehng ajehng e kpimm a Isreel,

⁶ nong bo ka-r aneblum ebo na asehma ba lohng ege et'tohngo wahr wul bo, fere yale agub-jing ebo go esamahr bi Jehova go Gibeon ejahbe ji Sol, ye ji Jehova yehke no.>>

Owo ntul kehm bungu re, <<M bahk-n kake bo.>>

⁷ Ntul yake Mefiboseti mmona Jonatan ji mmona Sol, tib go nwongo nyi bo koo esamahr bi Jehova bade Devid a Jonatan mmona Sol.

⁸ Wo ntul rodo Amoni a Mefiboseti, abon abal ba Rijipa ji jolo mmona Aeya, ye ji á jele ka Sol, budu abon alon ba mmon no nkal no Sol no bo jo lung-e re Merab, Merab jele abon baa ka Adriyel

mmon no Bajilayi ji nnea Meholati.

⁹ Bo ba á yake bo ka anebe Gibeon, bo song wul bo, fere yale agubjing ebo go ewong, esamahr bi Jehova. Bo kpee ane asehma noongo edi ajehng; bo wulu bo ngare nyi agbokombang afung nya bo jo fv nsol, ana abali akiimi bomono.

¹⁰ Rijipa mmon no Aeya no nkal, rodo abomo nya ane kpo kak noongo elkv song yal go ekpartal ka elne. Bomo ngare nyi bo bomono nsol afohko tete elahb na go elbung wohngo agubjing nyao, á tikem taame re nrük kooro bo ngare njul afi abi enyam ngare atv.

¹¹ Eji bo tongo Devid, ji Rijipa mmon no nkal no Aeya ma lim, ye ji jolo nne elgoro no Sol,

¹² á tahme song rod akahb nya Sol a nya Jonatan mmon ewe, goji afono ejahbe Jabesi Giled. (Bo v agubjing ebo go elatahkgur go Beti San edi ji anebe Filista kahne bo tohko, ngare nyi bo wulu Sol go Gilboa.

¹³ Devid koo akahb nya Sol abola Jonatan feere a nya, fvfo akahb nya ane asehma ba anebe Gidion kanne bo alehke wul bo fere yale gbuul bo t'tob kpu.

¹⁴ Bo ba kpa akahb nya Sol a Jonatan mmon ewe kak elahm bi ndea Sol no bo jo lung-e re Kisi go Jela ji li Benjamin, fere lim ejum ajehng ajehng ji ntul ka elkahn. Eji ma jol ano, Esowo kehm faange ero go eyaame ji ndi.

Ebta a anebe Filista

¹⁵ Ebta kehm kpe gbo anebe Filista a anebe Isreel. Devid kehm tahme a ane ebe re á song nok a anebe Filista, fvfo eko mal-e mal.

¹⁶ Fvfo Isibi-Benob, ye ji lohng et'tohngo ji Rafa ye ji ekuungu ji bo ko lim elkong ene jo lubu rehng ekilo ebra kunu ejang, a l'dumu, á fili ekahngkahng bi mfemfe, á bungu re ye bahke wulu Devid.

¹⁷ Wo Abisayi ji mmon no Jeruya kehm bake goji Devid ba nok tahr-e yake, fere wul nnea Filista noo. Owo ane ba Devid kehm koko nwongo tong-e re, <<Nsi nsi, a wahr nehm kpe tiki toono je ebta, eji enyaale ji anebe Isreel l'k'lahme.>>

¹⁸ Eji ma kang, ebta kpe gbo a anebe Filista go Gob. Ngare nyio Sebekayi nnea Husa wulu Safa ye ji lohng go et'tohngo ji Rafa.

¹⁹ Go ebta behko bi anebe Isreel noko a anebe Filista go Gob. Elhanan ji mmona Jari nnea Betlehem wulu mmonannyehna Golayad nnea Giti ye ji bele elkong ni ehti ebe gbale ana elub lub ehti bi bo kpo ko tub abomo.

²⁰ Go ebta behko bi kpe gbo go ndi Gati, bi nne awohng no jolo ekolo, á bele anyohkobo arakera ebo abehng abehng, anyohkgung arakera go ekpade ajehng ajehng, kpe kpe jolo eltahl eni. Ye fvfo tob lohng et'tohngo ji Rafa.

²¹ Eji á jo nyoko anebe Isreel, Jonatan ji mmona Simea, ye ji jolo mmonannyehna Devid wo wul-e.

²² Ane ani baa lohng et'tohngo ji Rafa ji li go Gati, bo gbo yel abo nya Devid a nsoja enye.

22

Ese eltehke ji Devid

¹ Devid yimi ka Jehova alum nya ese jia eji Jehova tahr-e yehke go abo nya anebekv ebe kpee, fvfo yehke ebo bi Sol.

² Á bungu re,

<<Jehova wo li ekpartal ejame,

Edi elbiiri ejame, a nt'tahre ewame;

³ Esowo ebame, bi li ekpartal ejame, ege wo m kpo biiri, ye wo li ekum ebame, a eko eltahre ename. Ye wo li eko ebta ebame, edi elbiiri ejame, a nt'tahre ewame, go ellong anebe atongtong á kpo tahr-m tahre.

⁴ N lungu Jehova, ye ji eltehke fuumu no ka-e, fvfo a tahr-m go ebo anebekv ebame.

⁵ Ekehre ji elkv jo limi senng-m kak, ebuku ji elranng jo ba bul-m.

⁶ Alehke nya elkv kpenng-m; Akpoko nya elkv ba gbahl-m.

⁷ <<Go egame ejahkjahk n kehm lungu Jehova, n rabe lung Esowo ebame. Go ege etahk, á wuku ellum ename; eling ebame yel-e atung.

⁸ Ndi jo k'kahn, fere gbehke, abangenahb akahme nya elbung gbuungu, jo kahme tibre atahng rak-e rak.

⁹ At'tohk jo lohng-e go atang nwul; agun nya kpo fi jo lohng-e nnyo, akalengun nya kp'lulu kpo lohng o.

¹⁰ Á kpo yang elbung fere badde ba, anyak-enyake akparesemsem kpo jol-e go ege ndab kpade.

¹¹ Á kuumu serubim fonngo, elfeb ni li akpungkpung nya kpo sol-e yanng.

¹² Á ko ejanng e bulu elne, ji li anyakenyake akparesemsem nya li go elbung.

¹³ Elbare ni elbohngo ene, kpo nyaale nyaa ana emangedu.

¹⁴ Jehova bungu ana ndan go ero elbung. ellum ni ye Ji Gbale Sehng wahle na wahl.

¹⁵ Á ta atakelban enye, anebekv raade, á ko egburu ebanng ebanng e emangedu kam bo raade.

¹⁶ Ngare nyi Jehova l'kaa enyam go ege elv ni lohng-e go atangenwul adamme nya agburu aya, jolo gbuul, nnahbekahme nyi ndi noongo kpiriing.

¹⁷ Á badde go elbung, ba tub-m ejahm, á tohng-m yehke go alahb ma kp'rahbe.

¹⁸ Á tahr-m yehke go atahntahn abo nya nnekv ewame, goji anebekv ba sahb t'tahne sehng-m.

¹⁹ Bo ba gbahl-m efung bi ejahkjahk jolo aname, wo Jehova wo jolo nt'tobo ewame.

²⁰ Ye wo koom ba edi ji kp'gbale, á tahr-m yake, tib á bele eyebatahng aname

²¹ Jehova eblim ebnob aname toono ana n jo lim ji li nseenga, toono ana n jo lim ji li saang, á ma-m tuuru.

²² Tib me m bum abang nya Jehova. Ebi ajehng ajehng n ka li go elsenng e Esowo ebame njahm.

²³ N kpo bum tahm enye kpee, n ka senng e njahm ege ajehke.

²⁴ Ebi me-e a ka ka go ege esamahr, fvfo me n yehke elname go abiafem.

²⁵ Jehova ma-m tuuru tib ana n li nseenga nseenge, tib ana n li saang go ege esamahr.

²⁶ Jehova, goji nne no kpi ekakesehk, a kpo tib

elna ana wo kpi ekakesehk, goji nne no kala li ebi, wo kpo tib elna ana nne no ki kpi ebi,

²⁷ goji nne no li saang, wo kpo tib elna ana a li saang, wo goji nne no kpo nehm ane, wo kpo bib tob ab'bi ane.

²⁸ A kpo tahre ane ba kpo rede elbo, wo amahr enya kun eji aneb elgeere re wo rede na bo.

²⁹ Wo Jehova, wo wo li enyaale ejame, Jehova kpo kpiidi ejanng eja ebfere jol ellennge.

³⁰ Tib go ega ekakebo, m bahke ma ga nlong nsoja, ana Esowo li aname m bahke ma yehb siiri ekahme ji kpo baabe ejahbe.

³¹ Goji Esowo, mbang enye li nseenga nseenge: ellum ni Jehova elem kpim; á kpo konngo ane kpee ba kpo biiri go ege.

³² Wo nne awoo li Esowo sehng Jehova? Nne awoo li li ekpartal, tohko jol Esowo ebahre?

³³ Tiki li re Esowo bi kpo ka-m eko, fvfo fere bum mbang enyame go nseenge.

³⁴ Á limi akpade enyame yiimi go ndi t'tahne ana nnyam ajiki, á kpo lim-m n yiimi go awahre wahre awong.

³⁵ Yeb tib abo enyame re jo nok ebta; akv abo enyame bahke ma gahl elban akuungu.

³⁶ Á ka-m ekum bi esehng ebta eba, ebjol ekum ebame; ekakebo eja ma-m lim me n jol egburu nne.

³⁷ Wob toobo mbang nyi kp'kpange ka akpade enyame, jia ebwahng ka akpade enyame kpehme roongo.

³⁸ N kame anebekv ebame, fere songkehr bo, n kpehme feere njahm tete n ranng bo.

39 N rere bo kpee, bo kpeem ma mehl, bo gbo n kadde bo egama ndabkpade.

40 Wo kpo ka-m eko ji ebta, á kpo rede anebekv ebame ka-m.

41 Á limi anebekv ebame senngge njahm jo be, fvfo n ranngge anebekv ebame.

42 Bo rabe aling nya eltobo, nnene jolem no bahke tahre bo, bo lingi tob Jehova, wo á faangem bo.

43 N jo dv bo nob nob ana ebtohko bi ndi, n jo bo fere kadde bo ana edob go ntoora mbang.

44 A ma-m tahre yehke go enok bi ane ebame, a ma-m kuuru bum re me n jol ntubesi no ajahbe. Ane ba n kii nyi bo, anv bo ba kp-m loko.

45 Ajahmjahm kpo kak-m kak, bo l'si wuk re me wo, bo kpo wuk-m wuk.

46 Bo kpee eltim kpo woono bo, bo kpo ba ekahmakahb, bo l'lohng go ebo eko ebta.

47 Jehova li elkpín. Eltehke jol ka ekpartal ejame. Elmehle wahre jol ka Esowo ebame, Ekpartal, nt'tahre ewame!

48 Ye wo li Esowo bi kpo bongo ka-m, ye ji ma rod ejahbe kak-m go elwo,

49 ye ji ma-m foro yake goji anebekv ebame. A mehl-m wahre sehngge anebekv ebame, a yehk-m yake go abo nya nne atongtong.

50 Fvfo m bahk-a tehke wo Jehova go ellong ajahbe, m bahke yimi eltehke ni mbing enya.

51 Á kpo ka ntul ewe egburu esehngge ebta, á kpo tib nne ewe no bo kak-e akehng go esi nnoobo eljini ene ni kil jo kane, ka Devid a et'tohngo eje go njinanjini.

23

As'kohro Alum Nya Devid

¹ A wo li as'kohro alum nya Devid: << Akahme kahme alum, nya Devid mmona Jese, ntooro nyi nne, ye ji Nne no Gbale Sehng mehl-e no wahre, nne no Esowo bi Jakob kak-e akehng go esi, nne no lim ayebe yebe ase eltehke nya anebe Isreel.

² Etohko ji Jehova bungu sehng egame, ellum ene jolo egame ebliki.

³ Esowo bi anebe Isreel b'bung, Ekpartal ji anebe Isreel bungu tong-m re, <<Nne no kp'fili ane go mbang nyi nno, á l'jo fili ane go elfahle ni Esowo,

⁴ á li ana ellennge ni efungfu eji njul ma ta elbange, efungfu bi akparesemsem kahla lohng, fvfo ana edi kpo bar, elahb l'na ji kpo bange ajele ndi.>

⁵ Ki li re etahk ejame jolo nseenge a Esowo, etingitingi á jolem limi egbanngalung ji nkahlkahl aname, yeptoobo nsol kpee, fere baame nkpe anyehng anyehng; etingitingi kehn á nehm taame re eltahre ename jol k'kab akab, fvfo fere faang-m ejum ajehng ajehng ji n kp'sebe.

⁶ Wo abi ane li re, bo temme bo bum nkpe ana ajoongo, nya nne l'k'ko ebo kpu.

⁷ Nne awohng awohng no l'kooro ajoongo, á kpo ko ebti akuungu afi nnaahb elkong, bo kpo jahm fi edi ji nong no.>>

Atakuru abanoko ebta ba Devid

⁸ A wo abing nya atakuru abanoko ebta ba David; Joseb-Basebeti, nnea Tahkemon, ye jolo ntubesi no akahme kahme nlong ane ara ba jolo

atakuru ba Devid baa, ye wo rodo elkong ene nok wul ane atahltahl nkpel ebal, ebta na abehng.

⁹ No toon-e no Eleaja mmon no Dodaya nnea Ahohiti. Ye jolo ellong atahntahn ane ara ba jo ga nok, ye jolo a Devid eji bo jo nyok anebe Filista ba ba kono go Pasi Damim re bo nok ebta. Egom nsoja Isreel be feere,

¹⁰ wo Eleaja yiimi t'tahne wul anebe Filista tete ebo ebe lahng fere kpo nt'tehne lak ekah-ngkahng. Jehova ko egburu esehngebta ba ka bo efung bio. Ellong nio feere song kpiri Eleaja, wo bo fere ba da nsol nyi akvne nyao.

¹¹ No kpe toono, bo jo lung-e re, Sama mmon no Agee nnea Harari. Eji anebe Filista kpu no song kono edi egbe ji bo kpo bahm anyerenyere amohk nti nya bo kpo lung re alenti, anebe Isreel b'be esamahr ane bao.

¹² Wo Sama yiimi t'tahne go elka egbe tahre edi egbe jio fere wul anebe Filista, Jehova ka anebe Isreel egburu esehngebta.

¹³ Ngare nyi bo jo fv nsol, atahntahn abanokobta ane ara go ellong eltahl ane awubu, ba goji Devid go egohng ji Adulam, gana ellong nsoja nyi anebe Filista ebba kono edamme ji Refayim.

¹⁴ Ngare nyio Devid jolo go ekobta, fvfo nlong abanoko ebta, ba anebe Filista ruru go Betlehem.

¹⁵ Devid jo sebe alahb, á kehm bungu re, <<Eya, li re nne bahke ma song ko alahb elwoko go elbing alahb ni li kohlo etimbu ji Betlehem.

¹⁶ Owo atahntahn ane ara baa kehm yange sehng go ellong nsoja nyi anebe Filista song tohng alahb go elbing alahb ni li kohlo etimbu Betlehem

sol ba ka Devid. Wo á ten go elwoko, á fere yaange na wohng go esamahr bi Jehova.

¹⁷ Kehm bungu re, <<Ndan gbaa aname, Jehova, re me n lim ejum jia!>> <<Alung sang a, ma ane ba ma riki nkpín eboa?>> Devid woom alahb mao.

Ejum jia atahntahn ane ara ba bel etahne eltim lim.

¹⁸ Abisayi mmonannyehna Joab mmona Jeruya, ye ji jolo ntubesi go ane ara baa. Ye rodo elkong ene nok wul ane atahlku, owo elgahm ene kehm yeere, go ellong atahntahn atakuru ane ara baa .

¹⁹ Anv, ye wo ga bel ekpunu go ellong atahntahn atakuru ane ara baa. Ye wo jolo ntubesi a bo, jol eji bo ki-e f'fange budu go ellong ane ara bao.

²⁰ Benaya ji mmon no Jehoadá, á tahne eltim go enok, á lohng go Kabjeel, á jo limi agburu nsol. Á wulu atakuru anebe Moab na abal. Á tob ye le elbing, efung elahb atal song wul egabe.

²¹ Á kpe tob wul ekolo nnea Ijib. Jol eji jolo jol re nnea Ijib fili elkong ege ebo, Benaya wame kpir-e a ebtahmtahm. Á fooro na nnea Ijib elkong ege ebo, fere ko elkong nio wul-e.

²² Benaya ji mmona Jehoadá, ye wo limi nsol nyia, ye fvfo elgahm ene tob yeere ana atahntahn atakuru ane ara bako.

²³ Ye wo ga bel egburu ekpunu sehngé atahntahn atakuru eltahl ane awubu bao, wo ye bo we-e fangem kak go ellong atahntahn atakuru ane ane ara bao. Devid bum-e á jol ntubesi go ellong ane ba jo baab-e.

²⁴ Go ellong eltahl ane awubu bao, abing ebo nya a,

Asahel ji mmonannyehehna Joab,
Elhanan ji mmona Dodo ye ji lohng go Betlehem.

²⁵ Sama nnea Harod, Elikan nnea Harod.

²⁶ Heleji nnea Palti, Ira mmon no Ikeshi ji lohng go Tekoa,

²⁷ Abiejer ji lohng go Anatoti, Mebuna ayi nnea Husati,

²⁸ Jalmon nnea Ahohiti, Maharayi nnea Netofati,

²⁹ Heled mmona Baana nnea Netofati, Itayi mmona Ribayi ji lohng go Gibeon go et'tohng ji Benjamin.,

³⁰ Benaya nnea Piratoni, Hidayi ji lohng ejang ngba nyi Gaasi,

³¹ Abi Albon nnea Abati, Ajimaveti nnea Barhumi,

³² Eliaba nnea Saalbon, a abon ba Jasen, Jonatan

³³ Sama ji nnea Harari, Ahiyam mmon no Sarar nnea Harari,

³⁴ Elifeteti mmona Ahasibayi nnea Maakati, Eliyam mmona Ahitofel nnea Gilon,

³⁵ Hejiro nnea Kamel, Paarayi nnea Arbi,

³⁶ Igal mmon no nluu no Natan ji lohng go Jobahi, Bani ji lohng et'tohng ji Gad,

³⁷ Jelek nnea Amon, Naharayi nnea Beeroti, ye ji jo fili nsol ebta nyi Joab mmon no Jeruya,

³⁸ Ira nnea Itri, Gareb nnea Itri

³⁹ a Uraya nnea Hiti. Bo jolo eltahl ane elku ane abal kpee.

24

Devid fange abanoko ebta go Isreel

¹ Jehova atahng kehm-e kpe rak tob anebe Isreel, á melle Devid re á tong bo re, <<Song wo song fange anebe Isreel a Juda.>>

² Owo ntul kehm tongo Joab a atubesi nsoja ba jolo a ne re, "Songen go at'tohngo Isreel kpee, bomo go Dan rehng Beeseba, wo fange abanoko nta, eji n l'kahn nfange ana nyi bo li no.

³ Wo Joab faange ntul re, <<Nong Jehova Esowo eba lim nlong nsoja rur nkpel atahlalon budu, nong amahr nya nsoo ntul ewame nyehn bo. Wo jenji wahnge nsoo ntul ewame yahke lim elkohn ejum ana jia?>>

⁴ Fvfo ellum ni ntul gbale Joab sehng a atubesi nsoja, owo bo kehm tahme elbohngo ntul re bo song fange abanokonta, bo anebe Isreel.

⁵ Eji bo siiri aya ma Jodan, bo re ekv kohlo Aroe, ejang eboblum bi ejahbe edamme, soro asongo go Gad tete rehng go Jajer.

⁶ Bo tahme go Gilead a erohko ji Tatim Hodsi, tob rehng Dan Jaan, sennge asongo go Sidon.

⁷ Owo bo soro asongo go ekobta bi Taya a ajahbe kpee nya anebe Hiv a Kanan. Elkohro bo rehng go Beeseba go ewum wum ndi ejang eboblum bi Juda.

⁸ Eji bo ma jen go ndi nyi Isreel kpee, bo kehm feere go Jeusalem elahme nnyahng esehmwubu, kunu nfung eltahl.

⁹ Joab kehm ba tooro nfange nyi abanokonta tong ntul go Isreel, jolo ane atahl atahl nkpel atahl atahl nkpel elon (800,000) ba jolo atahntahn

aneblum, bo ji bahke ma fili nkahngkahng, go Juda, nfange ane jolo ane atahl atahl nkpel atahl atahl nkpel era a nkpel atahl abal nkpel ewubu. (500,000)

¹⁰ Devid eltim kehm-e moongo, eji á fange abanoko nta, á kehm tongo Jehova re, <<Me n lim abiafem gbalee go ejum ji m ma lim, Anv, Jehova n kpa-a gboongo, yehke ebi ji nlokeltum ewa ma lim. Me n lim ebi ji sahb li egboolo ejum.>>

¹¹ Re Devid kehm nyahme njahm efungfu behko, ellum ni Jehova ebba goji Gad nnyehnamahr, ye wo jo nyehn ka Devid.

¹² Song wo song tong Devid re, <Ji ji a ji Jehova kp'bungu, <N kp-a bumu nsol era, yehke ajehng ji m bahke koko lim-a.> >>

¹³ Owo Gad kehm tahme goji Devid, song tong-e re, <<Njal ba nnya era go ndi nyia? Afi elbeke ni anebekv bahke jo kama go nnyahng era? Afi ayam elkv ba ndi enya nfung era? Anv gbo ntir bade, wo yehke ana m bahke faange nne no tum-m no.>>

¹⁴ Devid kehm tongo Gad re, <<Me n jol go egburu ejahkjahk. Nong wahr gbo yel go abo nya Jehova, tib ndon enye kp'gbale, wo ka nongo me n gbo yel abo nya nne.>>

¹⁵ Owo Jehova kehm tumu ayam elkv tv anebe Isreel bombo efungfu bio tete song rehng ngare nyi á tongo no, nfange ane nyi kpoo no jolo ane atahl atahl nkpel atahl anehkeni a nkpel elku, (70,000) ane ba kpo no bombo go Dan song rehng go Beeseba.

¹⁶ Eji enjel jol ranng Jeusalem, Jehova kehm sahde ayam elkv nyao fere tong enjel nyi jo kak

bo erem re, <<Ebgbal! Yehke ebo eba.>> Enjel nyi Jehova jolo edi ji bo jo dv arasi Arauna nnea Jebusi.

¹⁷ Eji Devid nyehne enjel nyi jo wul ane, á kehm tongo Jehova re, <<Me n lim abiafem; Me mbaabe ebul, me n lim soodo. Bo jia ejoro bi, jenji bo ma lim? Nong ebo eba gbo kuumu me a nnahb enyame.>>

Devid limi egudu njom

¹⁸ Efung bio Gad je goji Devid song tong-e re, "Song wo song lim egudu njom ka Jehova go edi ji bo kpo dv arasi nya Arauna nnea Jebusi.

¹⁹ Owo Devid kehm tahme ana Jehova ma ka elkahn sehng goji Gad.

²⁰ Eji Arauna nyehne ntul a atubesi abal-imeltum ebe kp'bake ege, á kehm tahme, song gong go esamahr ntul a esamahr ebe go ndi.

²¹ Arauna bungu re, <<Jenji wahnge nsoo ntul ewame ma ba goji nlokeltum ewe?>>

Devid faange re, <<M ba re me m ba gunu edi arasi adohko eja, eji n l'lim egudu njom ka Jehova, eji eyam elkv bi li ellong ane l'rahke.>>

²² Arauna kehm tongo Devid re, <<Nong nsoo ntul ewame rod ajehng ajehng ji fuumu a ne lim njom. Nyehn efong ga bi njom nyi eljahme fi, nyehn nsol elkoko dv arasi ga, a ab'bini nya li nkun.

²³ Go ega Agbal, me Arauna, me n ka ntul nsol nyia kpee. Arauna kpe bungu re, <<Nong Jehova Esowo eba ko-a.>>

²⁴ Wo ntul faange Arauna re, <<E'ee m bahke gunu na kpi-a, n nehm lim njom ka Jehova Esowo

ebame, njom nyi eljahme fi nyi kiim kim ekun abehng abehng.>>

Owo Devid kehm gunu edi ji bo kpo dv arasi, a efong, ka asilva atahlabal esilva ebwubu.

²⁵ Devid limi egudu njom ka Jehova o, fere lim ajom nya eljahme fi a ajom nya elkoono. Owo Jehova kehm faange ero ebe go esi ji edi ndi, eyam elkv bio ka anebe Isreel soro rahke.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4